

Basef Ifimba Pol Nali' Nanda'ef Fagafe'ma Esis Korini

Basef bandafi Pol nanda'ef fali' fagafe'ma Korini

- 1:1-9 Pol nanifela Goda esis Kristen sagape Korini
1:10-4:21 Esis Kristen Korin sandawal biafis apa' Pol na'ipasa basefa waf hiafi Kraisi faloma waf amom aposeli
5:1-7:40 Esis Kristen sanda' anef waf awafi ea' Pol na'ipasa waf bu'wafi daso'amaifi
8:1-11:1 Pol na'ipasa basefa mafis anis sahas sondolalima God baso'amunaisi. Ea' nasa'ma ukup asasipi ma solawais. Na'amba sila waf esis Israeli awafi.
11:2-14:40 Waf saga' gwa'a isi Jisasafi faloma presen amamba hiahaom fasimi God nagaso'apaami
15:1-58 Basef kofagefa ma Kraisi nogosafel wapani
16:1-4 Otamba esis Korin sakolasemba bafe'ma anis Kristen kwahusa otamba maisi
16:5-24 Basef Poli akutaifi faloma basefa dagala ananini
-

1 ¹⁻² Ae' Pol aposel Jisas Kraisi anda' maol ananini. Okom Godi atom nofale nandandepe anda' maol inimba. Ae' aloma owamapa Sostenes wape na'a'e wasapa' dagala nemaf bu'wafi nefe'mago ipa' amam nematawa Kristen sios pagape Korini. Ea' anda' basef ifimba fafe'mago ipa'. Ipa' pagape sisihipama Kraisi Jisasi, God nanda'epa pape hilili' nofalepa nosaho'epa ea' ananipai atipa. Afa' biafa wase'epa dagala ipa' paloma epes hiasi ma walemb hielimbi sogofala agol Dembinai ape'inai Jisas Kraisi, anen dembinai ma apa', esis wapani.^a

^a 1:1-2 Ro 1:7; 1 Ko 6:11; Ap 9:14

³Afa' biafa wa'i God ape'inai noloma Dembinai ape'inai Jisas Kraiss monda'ago ipa' andeande' mumafipa motopalopago opalef ipe'ilifi fepe sa'ombel.

Pol nanifela God

⁴Ae' anifela God dondola ipa'. Dei' main, ipa' pagape sisihipama Kraiss Jisasi. Ea' God notopalopepa dowafa pegape andeande'ma anen atona. ⁵Ipa' pape sisihipama Kraiss pape andeande' a'owa ea' pefa' basef hiafi paga'iefi faloma gawa hiani bu'wani. ⁶Dei' main, basef ifimba bu'wafi Kraisi afa' wagawalapafi fataga alihif fandawalap banagambela opalef ipe'ilifi si'ilif. ⁷Ea' dei' ipa' pape ukup pehafa dembinai ape'inai Jisas Kraiss anaf nogataga alihina. Afamba pape pehafana apefa' presen hiani Ambal bu'unai Godi nagase'eapan dowafi hi'alan. Ina anin akepa, owa'atin. ⁸Jisas Kraiss atiasi nowa' banagaepa ma pegape banagepa atipipa pefe' pegatagama nemaf afamba Dembinai ape'inai Jisas Kraiss nogafi'afii ma diga basef kofagesa akepa nemaf afamba. ⁹God nanda' hiahawes ananisi hi'alas datimai nofalepa ma pegape opaf atof pegaloma Nogamana ananinai Jisas Kraiss Dembinai ape'inai. ^e

Amam nematawa Kristen sios a' sandawal wa'awa'as

¹⁰Apa' ipa' sahin owan, a'ipipa banagoga ma agol Dembinai ape'inai Jisas Kraisi na'amba. Ipa' pendape mini'ap atetep endilisi pindaila nomonas atifisa okom atotom. ¹¹Ipa' sahin owan ae'ipai, esis mini'ap Klwei sa'ipi sa'i ipa' panda' migimigah sape la'afena ipa'. ¹²Ae' a'i isimba, ipa' hipai atona atin paga'ias na'amba. Anis sa'i, "Apa' mini'ap Poli." Anis sa'i, "Apa' mini'ap Apolosi." Ea' anis sa'i, "Apa' mini'ap Pitai." A anis sa'i, "Apa' mini'ap Kraisi."

¹³Ipa' panda'as na'amba ma main? Ipa' pa'i Kraiss nandawal wa'awa'ana? Ea' pa'i ae' Pol sandele lawag usi'igai ti'wanaegai ma agatopalopepa? Owa'atin endilisi. Ipa' ina pefa' baptaisa agol ae' Poli, owa'atin. ¹⁴Ae' anda' baptaisima amam amamba ipe'imi biam Krispusi Gaius atom. Anis epes ipe'isi daias, owa'. Ae' anifela Goda ina anda' baptaisima anis ipe'isi wapani, owa'. ¹⁵Ea' isimba dei' anin epen ina ni'ipipa ni'i ipa' pefa' baptaisa agol ae'agili, owa'. ¹⁶Endilisi, anda' baptaisima esis wambota Stefanasi wapani, apa' ae' ina okom mandanda'ma anis wapani, owa'. ¹⁷Dei' main, Kraiss ina nasapa'e afi'ima enda' baptaisima anis epes, owa'atin. Anen nasapa'e ma ewalapa basef bu'wafi Godi iga'if. Ae' ina ewalapa basef ifimba i'if ila anin gawa amom gawaimi maga'iani, owa'.

b 1:6 Lu 17:30; 2 Te 1:7; Ta 2:13 **c** 1:7 Fl 1:6; 1 Te 3:13, 5:23 **d** 1:8 1 Jo 1:3; 1 Ko 10:13; 1 Te 5:24 **e** 1:9 Fl 2:2 **f** 1:11 1 Ko 3:4; Ap 18:24-28; Jo 1:42 **g** 1:13 Ap 18:8; Ro 16:23
h 1:15 1 Ko 16:15 **i** 1:16 Mt 28:19; Jo 4:2

Na'amba epes si'i basefa lawag usi'igai ti'wanaegai Kraiis nagaga'agai si'i basef ifimba owa' banagafia falafifi atif.^j

¹⁸Endilisi, epes isimba sagape ufia'w higilgalasa'wi, esis ukup pandanda'ma basefa lawag agamba usi'igai ti'wanaegai sagandola Kraiisagai sa'i basef ambamba falafumi atom putuputa'imi. Apa' amam nematawa dei' God nape nofa'apa nakwahomapa waf awafi mogotanimai ea' mogawa basef amamba banagami Godi atom.^k

¹⁹Baibel naga'ias na'amba na'i, "Anaf ae' ehambombaga gawa esis isimba gawaisi. Ea' elefata nomonas epes isimba gawaisi saga'i nomonas sasisasi hiahiasii sagapaisi."^l

²⁰Dei' amom gawaimi mondanda' mi'imama? Ea' amom gawaimi mogogawa gawa hianii monda' main? Ea' epes isimba itap apa'isi sa'i basef sapa'ef sandahihanamaifi sonda' mamahisa? Owa'atin. God nanda' gawa epes isimba itap apa'isi nataga falafalafini si'i epes isimba sahaga sagagaoli.^m

²¹Dei' main, epes itapasi ina la'ifisa sogogawa Goda gawa inimba asasini atin, owa'atin. God anen gawainai ea' nasopamasa ufia'w asasi'wi. Ea' anen okom mandanda' na'i nofa'ai amam nematawa sogahapifanai sotanimai. Esis sahapifa basef ifimba waga'ipasafi epes itapasi saga'i wafifi gawa akafi."ⁿ

Ea' God nofa'as sotanimai.ⁿ ²²Esis Juda ukup paipaila sigati maol banagani atin si'i God nanda'ani apa' esis Grik ukup pa'ipa'i sogofa' gawa hiani lu'wani.^o ²³Apa' afa' wawalapa basefa Kraiis nagaga' lawag usi'igai ti'wanaegai. Basef ifimba fahambombaga ukup esis Judai. Apa' esis Grik ukup pandanda'mef pa'i amamba basef wafimi gawa akami.^p ²⁴Apa' amam nematawa God nogofalapai, esis Juda saloma anis Grik wapani, basef ifimba fa'i Kraiis anen banagami gawa Godi.^q ²⁵Dei' main, basef amamba Godi epes saga'i "Gawa akami wafimi", amamba gawaimi atom lu'wami mikila' gawa epesi. Ea' hiahaom amamba epes saga'i "Awanami falafumi Godi", amamba banagem a'owa' mikila' banagami epesi.^r

²⁶Alipipai ae'ipai, ipa' ata' ukup pendanda'ma fowa' dambadamba God nogofalepa ma pagataga Kristen. Ipa' hipai ina anis epes hiasi la'afena ipa' gawaisi ma itap ana'e, owa'atin. Owa' anis hiasi agof lu'wagufisa. Ea'owa' anis hiasi dembesi banagasia, owa'. ²⁷Apa' God okom ananiami atom nandandepa anis epesa sogape ananisi atis. Epes isimba esis amam nematawa itapasi saga'i gawa akasi, apa' God nandandepas ea' ma nogaha iwana epes gawaisi. Ea' epes isimba itapasi hiasi saga'i falafalafisi owa' banagasia, isimba God nandandepas ea' ma nogaha

j 1:17 2 Ko 4:3; Ro 1:16 k 1:18 Ais 29:14 l 1:19 Ais 19:12; Ais 33:18; Ais 44:25; Jop 12:17 m 1:20 Mt 11:25 n 1:21 Mt 12:38; Ap 17:28,32 o 1:22 Ro 9:32; 1 Ko 2:14 p 1:23 Kl 2:3 q 1:24 2 Ko 13:4 r 1:25 Mt 11:25; Jo 7:48; Je 2:1-5

iwana epes isimba dambesi banagasi. ²⁸Anen nandandepa epes isimba amam nematawa itapasi saga'i owa' fasisia, falafisi atis dowafi agof akasi. Aho', anen nandandepasa nogahambombaga hiahaom amamba banagami mogoloma epes isimba banagasi agufisi itap ana'iisi.^s ²⁹Nanda'as na'amba ma anin epen ina la'ifina negasa'ma agol ananigili atogol lu'wagola naep Godi, owa'.^t ³⁰God nahapona ipa' pape sisihpama Krai Jisas ea' nanda' anen nape kofagonama gawa ape'ini. Anen atona ufa'w ape'ikwi ma God nanda'apa mogape be'epa hilili'i ma naep ananipi ma mogape ananipai atepa. Anen atona natalepa nakwahepa ma waf awafi ma magape wahifipa.^u ³¹God nanda'am na'amba ma anif basef fagail Baibeli fetaga fendawalap. Basef ifimba faga'i, "Epen ami ni'i sonogahani, anin a' sonondahana Dembinai atona."

Pol nawalapa basefa Krai nagaga' lawag usi'igai ti'wanaegai

2 ¹Alipipai ae'ipai, fowa' agafe'mago ipa' awalapa basef endilisi Godi ma ipa', ina awalapef a'if aloma gawa ae'ani lu'wani, ma basef bu'wambu'wafi ma iga'i'ipipa, owa'atin.^v

²Dei' main, okom ae'ami mandanda' na'amba. Afamba ae' ape agalomepa ina ata' okom mapoma anom maefah daiam, owa'. Okom mase'e hiahaom. Ae' okom mondapoma Jisas Krai atona. Aho', anen naga' lawag usi'igai ti'wanaegai.^w

³Isimba atis nemaf afamba ape agalomepa, ae' owa' banagewe, ae' pupuliwi. Ae' ombal mahe bolatin ape a'owa'.^x ⁴Ea' basef aga'ifa basef bu'wafi Kraisi, ifimba ina a'if gawa ae'ani aloma epesa igahekelipai, owa'atin. Ae' a'ipipa ihimba'mepa banagami Ambal bu'unai Godi atona. ⁵Anda'as na'amba ma ipa' ina ukup paipaila gawa epesi dei' pahapifa God, owa'. Anda'asa ipa' ukup pehafel pigapigaila banagami Godi atom dei' pahapifana.^y

Ambal bu'unai Godi naso'apa gawa

⁶Aho' endilisi. Ae' awalapa basef gawa nagapaifi ma epes isimba mamahisa sahapifa Goda banages ea' sanda' waf ananifi. Apa' gawa ini'i, ina itap apaini, a'a gawa amam agufumi ma itap apai anaf higiligalam lamonami.^z ⁷Waf ae'afi fowa' fagape na'amba, dei' wapani, awalapa basefa gawa Godi atin. Basefa gawa inimba fowa' nape nandambaho'ma epes, fowa' gani God ata' owa' nonda' itap apa'ea anen ea' nandandepa gawa inimba ma mogofa' banagami mogogala'i ananiami.^a ⁸Owa' anona aman atotona agilina ma itap apa'e nogawa basefa gawa inimbaea,

^s 1:28 Ro 3:27; Ef 2:9 ^t 1:29 Jer 23:5-6; Jo 17:19; 2 Ko 5:21 ^u 1:30 Jer 9:24; 2 Ko 10:17
^v 2:1 1 Ko 1:17; Ga 6:14 ^w 2:2 Ap 18:9; 2 Ko 10:1 ^x 2:3 1 Te 1:5 ^y 2:5 Ef 4:13; Fl 3:15
^z 2:6 Ro 16:25 ^a 2:7 Lu 23:34; Je 2:1

owa'atin. I'i amom mogawanai, dei' ina mofa' Dembinai mondolana lawag usi'igai ti'wanaegai, owa'atin. Dei' main, aman anamba banagonai mogogala'i banagamunai endilisi. Apa' owa', owa'atin. Amom agufumi ina mogawa basefa gawa inimba, owa'.^b ⁹Apa' ae' a'i basefa gawa inimba si'i Baibel na'ias naga'i,

“Hiahaom maim God nagandondombam ea' ma epes mamahisa ukup pagaila anen endilisi, amamba a' mikila' ukup epesi. Esis ina la'ifis same'am satolom sagawama ukupi naep aligah asasisi, owa'atin.”^c

¹⁰Apa' God nawalapa hiahaom amamba mandawalapa apa' ma Ambal bu'winai ananinai. Ambal Godi nati hiahaom hiami mape mandamabahi'i, ea' natolom nogawa nomonas hiasi ma waf Godi fape fandambaho' ape'i.^d ¹¹Dei' epen mamahina ipe'ini negawa nomonas anin epeni? Owa'atin. Ambal epen inimbai atol logawas. Ea' na'amba atin, ina anin epen negawa okom Godi, owa'. Ambal ananinai atona nogawana.^e

¹²Apa' ina mofa' spirit ambal itapali, owa'atin. Apa' dei' mofa' Ambal bu'unai Godi ma mogogawa hiahaom maim God nogaso'apam dowafi.^f

¹³Amamba ina nomonas gawa epesi sa'ipian, owa'atin. Amamba basef Ambal buwali Godi nagawalapafi. Dei' a'lipasa basef ifimba awalapef a'ifa Ambal bu'unai Godi ma epes isimba mamahisa Ambal Godi nagapaisi.^g

¹⁴Apa' epen ami Ambal bu'unai Godi akan, anin ina la'ifina negefa' hiahaom amamba fasim Ambal Godi nogoso'apam dowafi, owa'atin. Epen inimba okom mapoma amamba na'i falafumi sonda'am ki de'iafami. Anin ina negawam, owa'. Dei' main, Ambal bu'unai Godi atona nawalipasa amamba kofagema.^h

¹⁵Epen mamahina Ambal bu'unai Godi nagapaini, anin nagahihi' hiahawes hiasi. Apa' ina anin epen la'ifina nigahihi' epen inimba Ambal Godi nagapaini, owa'atin.ⁱ

¹⁶Aho', “Dei' epes ami sogawa hiahawesa okom Dembinai ma atiasi la'ifisa sigihimba'ma anis? Owa'atin.”

Apa' dei' apa' mofa' okom Kraisi mapaepa.

Amam manda' maol siosi amamba manda' maol Godii

3 ¹Alipipai, fowa' ae' ina a'ipipa basef si'i agaso'asef epes isimba sagaila okom Ambal bu'unai Godii, owa'. A'lipipaef si'i agaso'asef epes isimba ukup pagaso'asa basef kofagefa Godii, si'i awasi ata' saga' nomagof atogufi.^j ²Ata' ase'epa nomagof atogof. Ina dei' ase'epa gwa'aisi banagasi, ata' owa'. Dei' main, ipa' ina la'ifipa, ata' owa'. Ae' a'ias endilisi atis, ipa' dei' wapani ata' owa'.^k ³Dei' main, ipa' ata' pagape atapipa

b 2:8 Ais 64:4 **c** 2:9 Mt 13:11 **d** 2:10 Pro 20:27 **e** 2:11 Jo 16:13-14 **f** 2:12 1 Ko 2:4
g 2:13 Jo 8:47, 14:17; 1 Ko 1:23 **h** 2:14 1 Jo 2:20 **i** 2:15 Ais 40:13; Ro 11:34 **j** 3:1 Jo 16:12; Hi 5:12-13; 1 Pi 2:2 **k** 3:2 1 Ko 1:10-11; 1 Ko 11:18

ma waf opaf apinai. Endilisi, waf anamba nawalapai waf kowagalasafi faloma ukup awepa sahin owani ma basef fitapaifi ata' fape atapifa ipa'. Isimba sihimba'ma apa' hiapai ipa' ata' paila waf anamba nembel apinai. Waf anamba epes itapasi atona.^l ⁴Anin epen na'i, "Ae' mini'ap Poli." Anin na'i, "Ae' mini'ap Apolosi." Waf afambai ipa' ata' pape si'i epes itapasi atapipa.^m

⁵Ipa' ata' nomonas sondanda'mas andeande'. Apolos anen aman mamahonama? A ae' Pol aman mamahowema? Afa' biafa wanda' maoli atofa. Dembinai naso'afa maol nandandafa. Ea' maol inimba afa' biafa wanda'ani, ufiaw akwamba ato'w dei' ipa' pahapifa Krai. ⁶Ae' ali' ewaha olemb gwa'aimbi, Apolos nagi' nakolo' embelas. Apa' God atotona nanda'am mataga. ⁷Ea' dei' epen inimba negewaha olemb gwa'aimbii, anin agol akan. Ea' epen nagakolo' embelasi wapani anin agol akan, apa' God nanda' gwa'aisi isimba sagatagai, anen atona agol lu'wagili gatamana. ⁸Ea' epen inimba negewaha olemb gwa'aimbii naloma epen inimba nagaso' embelebii, esis bias sanda' maol inimba atini. Ea' esis bias atona atin anaf sofa' hiahawes sondahama maol sanda'ani.ⁿ ⁹Dei' main, afa' biafa wanda' maol atitin Godi. Ea' ipa' si'i aof ananifi.

Amom manda' maola siosi mandahama manda' ifagwi

Ipa' si'i ipat Godi.^o ¹⁰Ama okom ananiami magamagailapai nagatopalopapa dowafi nanda'e ataga ape ali' si'i epen gawainai nanda' ifagwi, ea' awa olaf fape falii' anis sola' ipat totomaf. Apa' epes hiasi atona atin solawais andeande' asola' ipat totoma olaf afamba.^p ¹¹Ipa' pegawa God nanda' Jisas Krai nape nali' si'i olaf fotawa fagali'i. Isimba atis ina ata' anin epen la'ifina nogawa anof olaf daiaf wapani, owa'atin. ¹²I'i epen ami ni'i nela' ipat togatoma olaf afamba ilifi, anin nenda' gol nela'ata o nenda' silva mogogala' gambigambisi nela'ata, o nenda' anemba otamba sagalotamamba a'owa'i, o nenda' lawah o nenda' walol o otalef alilifi, nela'ata.^q ¹³Nemaf afamba Krai nogafi'afii, maol inimba hiasi sonda'ani netaga nondawalap alihin nepe bo'wen a'a awen. Nemaf afamba fetaga feloma nif lu'wafi. Ea' nif ifimba fendo maol inimba hiani epes hiasi atona atini hi'ilana sogogawa maol asasini bo'wen a'a awen. ¹⁴I'i anin epen nela' ipat togatoma olaf afamba ilifi ma nif owa' fendetaea, anaf nefa' anom hiahaom fasimi. ¹⁵Apa' i'i ipat epen nanda' maoli fendota hi'igalata, anaf ina nefa' amamba fasimi, owa'atin. Endilisi, God nofa'an nogotanimai, apa' hiahawes akan nepe dowaf si'i mutanima magalu'wani nifi.^r

l 3:3 1 Ko 1:12 **m** 3:4 Ap 18:4,11; Ap 19:1 **n** 3:8 Mt 13:3-9; Ef 2:20-22 **o** 3:9 1 Ko 15:10; 2 Pi 3:15 **p** 3:10 Ais 28:16; 1 Pi 2:4-6 **q** 3:12 1 Ko 4:5; 2 Te 1:7-10 **r** 3:15 1 Ko 6:19; 2 Ko 6:16

Sios amam nematawa Kristen si'i ipat lu'unai Godi

¹⁶Ipa' pegawa a'a owa'? Ipa' atipa si'i ipat lu'unai Godi, ea' Ambal bu'unai ananinai nape nomona opalef ipe'ilifi. ¹⁷I'i anin epen nehambombaga ipat anamba, anaf God nohambombaga epen inimba. Dei' main, ipat anamba ananinai bo'ona hilili'i. Anamba ea' ipa' atipa.

Apa' ina mosa'ma agof epesi, na'amba owa'i

¹⁸Na'amba anin epen nembaso'ma anin atin. I'i epen ipe'ini okom mondanda' ni'i anin gawaini si'i epes itapasi sogofalasi, epen inimba andeande'ma nendambema ata' netaga okom moso'an nili' ma atiasi negataga epen gawaini endilisi.^s ¹⁹Dei' main, gawa itapani inimba falafalafini si'i basef epes sahaga sagagauli saga'iani ma naep Godi. Si'i Baibel na'ias naga'i, “God nofa' epes gawaisi ma waf gawaifi fafifafi asasifi atef baso'afi si'i epes sagaha mafis isalef.”^t

²⁰Ea' Baibel na'ias wapani na'amba na'i, “Dembina'i nogawa nomonas epes sogogawai falafisi atis.”

²¹Ea' anin epen ina nefela agof apa' epesi, owa'i. Hiahaom hiami ipe'imi atom. ²²Poli Apolos, Pita maloma itap apa'e saloma ambal namili a ga' wapani saloma hiahawes dei' sagapani, anaf sigi' sogatagai, amamba hiami ipe'imi atom. ²³Ea' ipa' epes Kraisi Jisasi, ea' anen Godi.

Anaf Dembinai atona nowaloga amom manda' maoli ananinii

4 ¹Ipa' pendegawa afa' wanda' maol Kraisi ugumafi basef endilisi Godi fowa' fape fandambahi'ii dei' fataga fandawalap alihif.^u ²I'i aman dembinai noso'ana maol anin epena nigimafian, anin nimafian ninda'an datima andeande' hi'indalan. ³I'i ipa' pewaloga waf ae'afi ma anis daias sonda'me kot sowaloga waf ae'afi, ae' okom mopoma amamba falafumi atom. Ae' wapani ae' atowe ina awaloga waf ae'afi, owa'.^v ⁴Endilisi, malogol gagape opaf ae'afi nomoni ae' ina ame' anef waf awafi anda'afi, owa'. Apa' isimba ina sihimba'me endilisi ma iga'i, “Ae' epen usi'wi hilili'i”, owa'atin. Aman dembinai jas nogawaloga ae'i, Dembinai atona.^w ⁵Ea' dei' nogota dondo'atai ata' owa' ma, ipa' owa'i pewawaloga waf anin epen daiana. Ipa' ata' pepe pehafa nemaf afamba Dembinai nugafi'afii. Anaf anen nofa'i hiahaom hiami mandamabaho' magape akoti motaga mondawalap hauguma nogogala'ma. Nemaf afamba anen nowalapa ukup epes hiasi pape pandambahi'i petaga pindawalap alihigima. Ea' God ni'ipapa basef ananifi apa' hiapai hi'ilapa atona atin dondo' ma maol apa' manda' ani, bo'wen a'a awen.^x

^s 3:18 Jop 5:13 ^t 3:19 Sam 94:11 ^u 4:1 Lu 12:42; Ta 1:7 ^v 4:3 Sam 143:2 ^w 4:4 1 Ko 3:8 ^x 4:5 Ro 12:3

Esis Korin safela agof asasigufi atogof

⁶Alipipai, ae' okom mandanda' ma'i etopalopepa. Isimba atis ae'i Apolos wihimba'mepa basef ifimba doko' aga'ipipafi kofagefa ma waf afa'ifi. Afa' wanda'as na'amba ma ipa' pegelafa waf ape'ifi basef ifimba kofagefa fa'ias faga'i, "Ipa' ina pimbisila' mu'uli inimba, owa'i."

Ea' dei' ipa' ina penda' du'waniga pesa'ma agola anona daiana, owa'i.^y ⁷Alipipai, ipa' panda'as mama? Ami nanda'epa pape dembipai pikila' anis epes daias? Hiahawes isimba hiasi God atona nase'epas. Ea' ipa' ina penda' du'waniga pi'i ipa' atipa dembipai banagipai, owa'i. Hiahawes isimba hiasi ipe'isi, God atona nase'epas.^z

⁸O aho', opalef ipe'ilifi asi'ilif ea'! Ipa' hiahaom hiamipai asi'ipa dondo'! Ipa' apikila'afa pataga dembipai king! O uwahipipa! Ae' okom ma'i a'owa' ma petaga pegape dembipai kinga atiasi ope dembifai king ogalomepa!^a ⁹Ae' okom mandanda' na'amba a'i God nanda' afa' aposel si'i epes sape agof akasi sagagi' endilisii. Epes hiasi hi'alas sagape ilif itapi saloma amom ensel wapani satolofa wandahama epes isimba atiasi sohas sogaga'i.^b ¹⁰Afa' wape si'i epes ukup pagaso'asi ma ogasa'ma agol Kraisi, apa' ipa' pape epes gawaipai ma waf ananifi. Afa' owa' banagefaea, apa' ipa' banagepa ea'. Ipa' agof lu'wagof, apa' afa' agof akafa.^c ¹¹Fowa' gani wapani nafi'i nataga nogota ata'e wape nolomahafa a bambafugah fataugahifa a'owa', ea' luwaguf mais akafa. Esis sindiwa lagof sahafa atin. Afa' wambel akafa ma ofe' ogape andeande'.^d ¹²Wanda' maol numa'uni endilisi ma lagof afa'igufi atogof. Esis sa'i basef sanda'afa findiwafa owa' afa' banagefa ofalo'mas wagwamasa basef bu'wafi atif. Esis sanda'afa aofa, wape banagefa watitilis, afa' ina wagwamas, owa'.^e ¹³Esis sa'ipafa basef awafi endilisi apa' owa' wagwamasa basef awanafi sa'osa'ombel. Wataga si'i alapita awasimi endilisi ma itap hiagoma si'i alogw gwagailasi, si'i itap sagafafali'api. Fowa' gani wape na'amba atin wafi'i wataga dei'.

Esis Korin sondaila waf Poli

¹⁴Ae' ina anda' basef ifimba ma fenda'epa ambagof ipe'igufi awagof, owa'atin. Ae' okom maimailipa si'i awasi ae'ipai, a'i isalima nomonas ipe'isi.^f ¹⁵I'i endilisi ipa' amom mogawalipipa basef Kraisi 10,000-pelaim ea' hapaimi, apa' ahapepa ina hiam, owa'. Waf Krai Jisasi atef ae' atowe ape ahamepa ipe'iwai, ipa' pataga batawis ae'ipai ma basef bu'wafi Godi agawalipipafi.^g ¹⁶Isimba atis dei' afela ukup ipe'ipi ma pigaila waf ae'afi

^y 4:6 Ro 12:6 ^z 4:7 Re 3:17,21 ^a 4:8 Ro 8:36; Hi 10:33 ^b 4:9 1 Ko 3:18 ^c 4:10 2 Ko 11:23-27 ^d 4:11 Ap 18:3; 1 Ko 9:14-15; 2 Te 3:8; Sam 109:28; Mt 5:44 ^e 4:12 Kra 3:45
^f 4:14 Ga 4:19 ^g 4:15 1 Ko 11:1; Fl 3:17; 1 Te 1:6

pegafe'.^h ¹⁷Ea' asapa' Timoti nafe'mago ipa'. Anen nogame ae'anai wanda' maol Dembinai. Anen nugumafi maol inimba datima andeande'i. Ae' okom mailana a'owa', dei' asapa'ana ma atiasi nogasa'ma nomonas ipe'isi ma basefi fe' poe ae'asi agaila waf Kraisi. Ae' agawalipa esis Kristen sios walemb anamba hiagoma ma basefi waf ea' isimba atis.

¹⁸Anipa ukup pandanda' pa'i ae' bola dao' efo'o ea' panda' du'waniga.ⁱ ¹⁹Apa' owa'atin. I'i Dembinai ni'i aho'ai, dao' efe'mago ipa' kwafalis. Apa' ae' ina efe'mago ipa'ma egegawa basef amam manda' du'wanigai manda'afi atif, owa'. Basef amamifi hapaifi. Ae' a'i efo'o egawa wafi maol mais Godi amom manda'asi.^j ²⁰Dei' main, kofegama amamba ma epes isimba sugawisa maol Godi nope Dembinai nugumafias, amamba ina hiahaom moga'ian atini, owa'atin. Amamba ina basef atif, owa'. Amamba banagami Godi atom. ²¹Ipa' ukup pa'i waf mamahefa, pa'i efa'ago bumbulita okom wandafumi efo'o ma igasindi'amonepa, o pa'i efa'ago waf okom magamagailipafi sa'ombelifi efe'mepago? Isimba nomonas ipe'isi atis.

Waf awafi so'a waulafi fape Korin

5 ¹Anif basef fatagama ae' fa'i waf afamba awafi so'a waulafi fapoma ipa'. Waf awafi endilisi fagahambombaga daso'amai, waf afambai epes isimba sogololama Godi ina sanda' anef waf awafi na'ambaifi, owa'atin. Waf afamba na'amba. Anona aman a' naso' nemata'w kugumafianai ahamana nagaso'akwi.^k ²Dei' ipa' ata' panda' du'waniga atin pasa'ma agof ipe'igufi ma waf afamba awafi ma main? Na'ambai owa'i. A' andeande'ma opalef ipe'ilifi fepe si'ilifa lef ipe'ini ma pegalopa waf afambai awafi. Ipa' pili'amona aman anamba nanda' waf afambai ma ina ata' nope wapani nolomepa, owa'.^l ³Endilisi, alop ae'api pape laogona ipa', apa' ambal ae'ali lape lalomepa. Ae' si'i endilisi ape agalomepa ma agawaloga waf aman anamba nanda'afi awafi.^m

⁴Dei' a'ias ea' na'amba. Nemaf afamba ipa' pendakolasafi ma agol Dembinai Jisasi, ambal ae'ali loloma banagami Dembinai ape'inai Jisasi amamba mope molomepa nemaf afamba.ⁿ ⁵Apa' a' miliamonago aman anamba nefe'mago Satana nogahambombaga alop poloma nembel apinai ananinai. Monda'as na'amba ma God nogowambilai ambal aman anambai nemaf Dembinai akutaifi.^o

Esis Korin sindali'amonago yis amamba apimi waminif atina aman anamba aunai nanda' so'a wauli

⁶Ipa' panda' du'waniga pasa'ma agof ipe'igufi atogof lu'wagof patiti waf afamba awafi fapomepa, amamba ina waf bu'wafi, owa'atin. Ipa' pegawa

h 4:16 Ap 19:22; Fl 3:17 **i** 4:18 Ap 18:21 **j** 4:19 1 Ko 2:4 **k** 5:1 Lev 18:7-8; Diu 22:30, 27:20 **l** 5:2 Kl 2:5 **m** 5:3 Mt 16:19; 2 Ko 13:10 **n** 5:4 1 Ti 1:20; 1 Pi 4:6 **o** 5:5 Ga 5:9

ea' basefa mu'uli inimba ma yis isimba sanda' bret tagatifi faga'i na'amba fa'i, "Yis kwasala'wis dowaf sanda' bret hiatai hi'alata tatef lu'uta."^p

⁷Ea' ipa' pili'amona yis amamba apimi ma pegape si'i bret dambaitai yis akatai, si'i endilisi ipa' pagataga epes dambaipai. Dei' main, sipsip sondolali sagahanama gwa'aisi lu'wasi Pasovai anen Krai, esis a' sahana naga' ea', si'i sondolali gwa'aisi mafis maisa God.^q

⁸Ea' apa' mondanda' gwa'aisi isimba lu'wasi Pasova, apa' ina mofa' yis amamba apimi, owa'i. Amamba si'i waf awasinai endilisi. Apa' mondofa' bret wafitai yis akatai, isimba si'i wafa ukup usi'ip hilili'i basef endilisifi.^r

⁹Anif basef ali' anda'ef fagafe'ma ipe'i, aga'if na'amba. "Ipa' ina pefala epes isimba sanda' waf awafi so'a waulafii pi'i alipisi, owa'i."^s

¹⁰Ae' ina a'iasa pegakwaha epes isimba endilisi sanda' waf awafi so'a waulafii, a epes isimba kowagalasa hiahawes anis daiasi a epes isimba sanda' wali o sagahambombaga anis daiasi soloma isimba sanda' lotuma god baso'amunai, owa'. I'i ipa' pi'i pegakwahis endilisima, dao' pekwha itap apa'e hi'indalepa.^s ¹¹Apa' basef dei' anda'afi kofagefa na'amba. I'i anona aman ipa' pegefalona owamepai nonda' waf awafi so'a waulafi o kowogalanama hiahawes anis daiasi o nonda' lotuma god baso'amunai, ni'i basef alafugahafi, nea' embel okom mogahanai, nonda' wal nohambombaga anis daias, ipa' ina pefalana alipinai ipe'inai pi'i basef pelomana, owa'i hapainai. Ipa' ina pea' gwa'aisi peloma epes na'ambaisi wapani, owa'.^t

¹²⁻¹³Maol sagahihi' epes sagape ando'ma siosi ina maol ae'ani, owa'. God atona anaf nowaloga waf epes isimbai. Apa' maol sagahihi' epes sagape nomoni, dao' inimba maol ipe'ini, ipa' pendanda'an. "Ipa' li'amonago aman aunai nape la'afena ipa' nanda' waf awafii."

Kristen ina sonda' kotima sahin owan, owa'i

6 ¹I'i anin epen la'afena ipa' nenda' basef fila anin epen daian, ina andeande'ma epen inimba netopa'ma esis amam nematawa Godi sope ma nefe' nenda' kota naep amom dembami jas mogololama Godii. Na'ambai owa'i. Andeande'ma epen inimba ambal aola nefe' nenda' kota naep amom jas mogololama Godii.^u ²Apa' amam nematawa Godi anaf mowawaloga waf epes hiasi itapasi hi'ilas. Ipa' pegawa isimba a'a owa'? Dei' mama? Al'i ipa' owa' la'ifipama ata' pegawawaloga basef atif sa'ufi fafifafi ipe'ifia? ³Apa' anaf mowawaloga waf amom enseli wapani. Ipa' pegawa isimba, a'a owa'? Isimba atis dei' apa' la'ifipa endilisi ma mogawaloga basef hiahawes itap apa'isi. ⁴Ea' i'i ipa' anif basefa hiahawes itapasima, dei' maina ipa' pagaso'am maol inimba sogawaloga basefa

P 5:6 Eks 13:7, 12:21; Ais 53:7; 1 Pi 1:19 **Q** 5:7 Diu 16:3 **r** 5:8 Mt 18:17; 2 Te 3:14
s 5:10 2 Te 3:6; Ta 3:10; 2 Jo 10 **t** 5:11 Mk 4:11; Diu 13:5, 17:7; Diu 22:24 **u** 6:1 Re 3:21

epes isimba owa' agof fogatomasa siosia? Owa'. ⁵Ae' anda' basef ifimba ma fenda' ambagof ipe'igufi awagof. Dei' main? Gawaimi ipe'imi hiami mape la'afena ipa' amom la'ifimama mogawaloga anif basef feगतaga la'afena sahin owan bias ipe'isii. ⁶Apa' owa' dei' anin epen alipini nanda' kotima sahin owan ananini ma naep amom dembami jas owa' mogohapifa Kraisia.^y

⁷Aho', ipa' panda' kotima esis alipisi ea' isimba atis dei' sihimba'ma ae' ipa' apewa ea'. Dei' maina owa' pepe pititilisa sonda'mepa waf awafia? Ea' owa' pi'i aho'mas sohondo' anom maefah ipe'imia? ⁸Penda'am na'amba owa'i. Apa' ipa' ea' panda' waf awafima anis epes pahokola hiahawes asasisi! Aho', ipa' panda' waf na'ambaifi ma esis alipisi endilisi ipe'isi atis.^w

⁹Epes mamahisa sanda' waf awafii, anaf ina sofe' anamba God nagala'ambemagoma, owa'atin. Pegawa isimba a'a owa'? Na'amba ipa' pembaso'ma ukup ipe'ipi atip. Epes sanda' waf awafi ma so'a waola anis amam nematawa daiasi, a epes isimba sanda' lotuma god baso'amunai, a epes sagahabombaga waf daso'amaifi, a amam amamba ukup paga'i waf nematawaifi, a amom amamba manda' waf awafi magaloma anom amami, ¹⁰a isimba sanda' wali, a epes kowagalasa hiahawes anis daiasi sa'i sogofa'as atini, a epes isimba sa' embela ukup magahasi, a epes isimba saga'i basef awafi findiwaifi ma anis epesi, ea' isimba sanda' wal sagahabombaga epesi, epes isimba na'ambaisi ina anaf sefe' suwis anamba God nagala'ambemagoma, owa'atin.^x ¹¹Fowa' anipa panda' waf afambai. Owa', God nasa'opepa nosaho'epa ea' ananipai atipa si'ipa. God nanda'epa' pagataga epes bu'upai hilili'i ma naep ananipi. Anen nanda'epa na'amba atina agol Dembinai Jisas Kraisi ma Ambal bu'winai God ape'inai.^y

Alop ape'ipi pondape usi'ip hilili'ma mogasa'ma agol Godi

¹²Endilisi, anif basef fape fa'i, "Hiahaom hiami hi'ilam andeande'ma ae' enda'am."

Apa' hiahaom amamba atiasi enda'ami ina matopalope, owa'atin. Basef ifimba faga'i, "Hiahaom hiami andeande'ma enda'am."

Basef ifimba fape, apa' ae' ina i'i aho'ma anin mae nepe lu'win nembale'e, owa'atin.^z ¹³Apa' anis epes daias sa'i, "Gwa'aisi isimba, alopi atis ea' alop papoma poga' gwa'aisi atis."

Apa' hiahawes isimba biasis, alop paloma gwa'aisi, anaf God nolamonas atef hi'ilas. God ina nanda' alop ape'ipi ma ponda' waf awafi so'a waulafi, owa'atin. Anen nanda'apa ponda' maol ananini atin bu'wani. Ea' anen

^y 6:6 Mt 5:39; 1 Te 5:15; 1 Pi 3:9 ^w 6:8 Ga 5:19-21; Ef 5:5; Re 22:15 ^x 6:10 Ta 3:3-7
^y 6:11 1 Ko 10:23 ^z 6:12 1 Te 4:3-5

Dembina ma alop ape'ipi nugumafiapi.^a ¹⁴ Ama banagami ananiami atom nasa'ma Dembinai nosafel wandof matmat, ea' anaf na'amba atina nosa'mapa mogosafel wandefef wapani.^b ¹⁵ Alop ipe'ipi alop wa'awa'ap Kraisi atop. Isimba ipa' pegawas a'a owa'? Ea' dei' ipa' pa'i ae' ata' etopa' anop alop wa'awa'ap Kraisi kwaia'up esap poloma alop ano'w nemata'w kwanda' so'a wauli? Owa'atin endilisi!^c ¹⁶ Epen mamahina nefa' alop ananipi nesap pogaloma alop ano'w nemata'w kwanda' so'a wauli, anin ea' nataga alop atifip naloma ako'w. Ipa' pegawa isimba a'a owa'? Dei' main, Baibel na'ias ea' waf afamba daso'amaifi usi'ifi na'i, "Esis bias asataga alop atifipa waf afambai."^d

¹⁷ Apa' epen ami nepe sisihin tatala'in negaloma Dembinai a' nataga nomonas atifis nalomana, si'i epen atitin.

¹⁸ Ipa' pendakwaha waf awafi so'a waulafi pefa' pendafe'. Anef waf hiafi awafi sanda'af alop ando' atogon. Apa' epen nanda' waf awafi so'a waulafi, nanda' waf awafima alop ananipi atop.^e ¹⁹ Alop ipe'ipi ipat bu'unai Ambal bu'unai Godii. Ipa' pegawa isimba a'a owa? Ambal anamba a nosaho'epa ea' nape nomona ipa'. Ipa' ina ipa' atipai, owa'atin. Ipa' ananipai atipa si'ipa.^f ²⁰ God natalepa ma maol lu'wani a'owa'. Isimba atis dei' pendasa'ma agol ananigili lu'wagola alop ipe'ipi.

Waf sandaso'amafi

7 ¹ Dei' a'i egwamepa basef ifimba hali'ifi panda'ef fagafi'ii. I'i anona aman owa' nogaso' ano'w nemata'wia, ea' andeande'.

² Apa' owa', waf naninani aunai ma so'a wauli nape. Ea' dei' andeande'ma amam nematawa hiasi atona atin sondaso'ama daindai.

³ Alop amani ako'w waulu'mana kumafiap. Aman ina nonda'imap ni'i ananipi, owa'. Ea' na'amba atina alop waulu'manai, alop anen waulunama'w akwa'unai. Ako'w wapani ina kunda'imap kwi'i akwa'upi, owa'. ⁴ Nemata'w ina kope dambe'w kumafi alop akwa'upi, owa'atin. Aman akwa'unai numafiap. Ea' na'amba atina aman ina nope dambena numafi alop ananipi, owa'atin. Ako'w waulu'mana kumafiap.

⁵ Ipa' bipa pandaso'ama ea' ipa' bipa anin ina newa' alafuga anin ninda'ima alop ananipi, owa'i. Ama i'i ipa' ukup pegape atogona pihi'ama alop nogota bandata ma penda' betena, dao' ipa' pinda'i awi na'amba atina pendabeten bu'wani. Ama ea', penda' alop pondaloma wapani. Na'amba ukup pese'epama pigimafi alop andeande' ea' Satan nogwambepa penda' waf awafi.

a 6:13 Ro 8:11; 1 Ko 15:20; 2 Ko 4:14 **b** 6:14 Ro 12:5; Ef 5:30 **c** 6:15 Mt 19:5 **d** 6:16 Jo 17:21-23; Ro 8:9-11 **e** 6:18 1 Ko 3:16 **f** 6:19 1 Ko 7:23; 1 Pi 1:18-19; Fl 1:20

⁶Basef ifimba ae'afi ma amam nematawa sondaso'ama fagape na'amba. Apa' basef ifimba ina lu'wafi ma pigailaf banagambili, owa'. Ifimba basef kwaia'uf aso'epaef atopalopepa.^g

⁷Ae' okom ma'i ipa' amam nematawa hipai pepe si'i ae', owa' egaso' nemata'wia. Apa' God a' naso'as hiahaom fasimi mandandas daindai. Anin anom daiam a anin anom daiam.

⁸Apa' esis amam nematawa owa' sondaso'amaia saloma nematawa alifiwai amom maga' makwahowa wagapani, isimba na'amba. I'i ipa' pegape dowaf si'i ae', andeande'.^h

⁹Apa' i'i owa' la'ifipama pepe andeande' pimafi nelelelmb beloma alop ipe'isi andeande'a, dao' pendandaso'ama. Waf ipa' pandaso'amafi, afamba a' andeande' fikila' waf ukup pegehafel banagepa waf awafi so'a waulafi.ⁱ

¹⁰⁻¹¹Apa' esis amam nematawa sandaso'ama ea'i, ae' aso'as mu'uli inimba. Inimba ina mu'uli ae'ani atin, owa'atin. Mu'uli inimba Dembinaii na'amba. Ano'w nemata'w ina ko'waha aman akwa'unai, owa'. Apa' ako'w kwi'i kogakwahona, kondape dowaf. I'i owa', kotanima kofe'ma anen wapani kolomana nembel atotombel. Ea' anona aman wapani ina nili'amonaw waulu'mana anani'wi, owa'i.

¹²Apa' dei' a'ipa ipa' iafipa na'amba a'i. Basef ifimba ina basef Dembinaii, owa'. Ifimba dei' a'ipipa na'amba a'i i'i fowa' esis bias owa' ata' sohapifa Kraisa ma sondaso'ama sili', ma dei' anen nagi' nahapifa Kraisa ako'w kwi'i aho'ma koso'ana kolomana kogape, anen ina nili'amonaw, owa'i.

¹³Apa' i'i ako'w ato'w dei' kugi' kohapifa Kraisa nogaso'akwa, ma ni'i aho' nope nogaloma'wa, ako'w ina kwili'amonana, owa'i. ¹⁴Dei' main, aman owa' nogahapifa Kraisia nape sisihina nagaloma waulu'mana kwagahapifa Kraisi, anen a' nataga andeande' si'i God nandandepana ea'i. Ea' nemata'w owa' kogahapifa Kraisia kwape kwagaloma anen nagahapifa Kraisi, a' kwataga andeande' si'i God a' nandandepa'w ea'i. I'i owa' ma, bola sogola awasi, ina atiasi sotaga bo'wes, owa'. Apa' dei' sape andeande' si'i God nandandepas ea'i.^j

¹⁵Apa' epen ami owa' negahapifa Kraisia ni'i nekwaha waulu'mana a'a waulunama'w, dao' anin a' nendafe'. I'i waf afambai fetaga na'amba ma esis isimba ipe'isi sahomewa o owamepa aman nemata'w, esis ina ata' tatala'is sape si'i sanda' kalabusi, owa'. God nofalapa ma mogaila wafa opaf awanafi.^k

¹⁶Nemata'w, ina' anaf la'ifinama negatopalopa waulunamena nogataga Kristen a'a owa'? Isimba ina' owa' negawasa. Ea' ina' aman wapani, anaf la'ifinama negatopalopa waulu'mina ine'ikwi kogataga Kristen a'a owa'?!

g 7:6 Mt 19:12 h 7:8 1 Ti 5:14 i 7:9 Mt 5:32, 19:9 j 7:14 Ro 14:19 k 7:15 1 Pi 3:1 l 7:16 1 Ko 7:20,24

Apa' mundaila waf God nagawalogamapaf ape'i

¹⁷Maol main bu'wani Dembinai nagawalogan nagaso' anin epeni, anin a' nendape atapina maol inimba atin nali' nanda'ani. Ae' a'ipas mu'uli inimba atina esis Kristen hiasi sios sagape walemb hiagomai.

¹⁸A'i anona aman mali' matopa'mana alop ananipi ma God dei' nofalana? Dao' anen ina a' nofana melet atamba alop ananipi wapani nombaho'wata, owa'i. Ea' aman ami owa' motopa'mana alopa ma God dei' nofalanaia, amom ina motopa'mana alop ananipi, owa'i.^m ¹⁹Waf magatopa' alopafi faloma waf owa' mogatopa' alopafia wapani falafifi atef. Apa' waf sagaila mu'uli Godiafi afamba waf endilisifi. ²⁰Ipa' pagapoma maol mamahina bu'wani God dei' nogofalipai, ipa' atapipa pendapoma maol inimba atin. ²¹I'i ipa' agof akipai panda' maol pagape lafela anis epesi ma dei' God nogofalipai, dao' ipa' ina ukup nimanipa isimba, owa'i. Apa' i'i ano'w ufa'wa pekwaha maol inimba pegape wahifipa, dao' andeande'.ⁿ

²²Dei' main, epen ami agol akani nanda' maol nagape lafela anis epesi, dei' epen inimba Dembinai nakwahoman waf awafi a' wahifin ea' ananini atin. Ea' na'amba atina epen nagape wahifina owa' negape lafela anis epesia dei' Dembinai nofalan ea' nanda' maol nape lafela Krais.

²³God natalepa ma maol bu'wani lu'wani ananini. Ea' ipa' ina pepe lafela epes itapasi, owa'i. ²⁴Ipa' alipipai, maol inimba mamahina bu'wani epen inimba nali' nenda'ani ma God dei' nogofalani, dao' anin a' nindapoma maol inimba atin naep Godi.^o

Basefa amam nematawa owa' sondaso'amaia

²⁵Amam nematawa isimba ata' owa' sondaso'amaia, ae' mu'uli Dembinai akemas, apa' awalapa nomonas ae'asi atis a'ipipa. Anen nati uwahipiwi natopalope ea' nanda'e anda' maol ananini andeande' datima. Na'amba dei' ipa' a' pendame' basef ae'afi andeande'. ²⁶Ama nogota ata'e dei' nimanimi lu'wami mataga, na'amba ipa' a' andeande'ma ipa' hipai pendape na'amba atin si'i dei' pagape. ²⁷Ina' nali' nagaso' nemata'w ea'i, ina nili'amonaw, owa'i. I'i ina' ata' owa' negaso' nemata'wia, ina' okom mondanda' ni'i nefa' ano'w, owa'i.^p

²⁸Apa' i'i ina' negefa' nemata'wa, ina nanda' waf awafi, owa'. Ea' i'i nemata'w aiawai'wi kogaso' aman, ako'w ina kwanda' waf awafi, owa'. Apa' amam nematawa sandaso'amai esis atiasi a' sofa' nimanimi lu'wami itap apa'e. Andaiwa'ma nimanimi amamba mogatagamepa.^q

²⁹Ipa' alipipai, a'i basef ae'afi kofagefa na'amba. Dei' nogota ata'e ea' bandata ma itap apa'e pa'i higilgalap. Isimba atis dei' ipa' amam pagaso'

m 7:18 Ro 2:25; Ga 5:6, 6:15 **n** 7:21 Fm 16; Ef 6:6; 1 Pi 2:16 **o** 7:24 1 Ti 1:12-13
p 7:27 Lu 21:33 **q** 7:28 Ro 13:11

nematawai pendape si'i nematawa akipai. ³⁰Ea' epes isimba sawa sagalifi sondape si'i isimba owa' sowa sogalifia. Epes sandagalai sondape si'i isimba owa' sondagalai. Ea' isimba sagatala hiahawesi sondape si'i sugumafi hiahawes isimba dowafi, owa' asasisia. ³¹Epes isimba sanda' maola hiahaom itapamii, sondape si'i isimba owa' ukup pigapigaila hiahaom itap apa'imia. Dei' main, apa' mogawa, itap apa'e atiasi petaga pendaho'of higililap.

³²Ae' a'i ipa' opalef fendape awanelef, andaiwa'ma hiahaom mamimami mogalalamona nomanas ipe'isi. Amam owa' mogaso' nematawaia ukup palapafe' hihipa maol Dembinai, ma'i monda' hiahawes Dembinai okom maga'iasi. ³³Apa' amam amamba magaso' nematawai, ukup amamipi pafe'ma hiahawes itap apa'isi. Ma'i mondanda' hiahawesa waf awo wauhiamam ukup panda'iefi. ³⁴Ea' ukup amamipi a' pandawal biafip. Apa' nemata'w aiawai'wi ata' owa' kogaso' amania, okom malamafe' a'owa' ma maol Dembinai. Ako'w okom mandanda'ma koso' ako'w ato'w kogafe'ma Dembinai ma kope anani'wi hi'igala'w. Apa' nemata'w kwagaso' amani, nomonas salasagafe'ma hiahaom itap apa'imi atom kwa'i kondanda' waf waulunama'w okom manda'iefi. ³⁵Ae' a'i basef ifimba ma etopalopepa pegape andeande'. Ifimba ina fegasopama ipe'i, owa'atin. Ae' a'i ipa' pendape usi'ipa dondol pendanda' maol Dembinai atin ama anis maemaefah ina sopati ukup ipe'ipi, owa'atin. Ipa' pendape ukup atifip endilisi.

³⁶I'i anona aman okom mondanda' ni'i, anen ina nanda' waf usi'ifima nemata'w aiawai'wi esis sandandepamana'w anini. Ama okom ananiami mohafema ako'w, ma owa' niti ano'w ufiaw'a, anen nila okom ananiami nogaso'akwa, ea' andeande'. Anen ina nanda' waf awafi, owa'. Esis bias ea' sondaso'ama. ³⁷I'i anen owa' okom bimbafim mopoma ako'wa, nope banagona ninindifa okom ananiami andeande' ni'ias ni'i ako'w kondape dowaf, na'ambai andeande' wapani. ³⁸Ea' aman ami nagaso' nemata'w anani'wi ea'i, anen nanda' waf bu'wafi. Apa' aman ami ata' owa' nogaso'akwa, anamba nanda' waf fasifi a'owa'.^s

³⁹I'i anona aman nagaso' nemata'wi ata' nogape namona, nemata'w akwamba anani'wi ata' kwape sisihi'w kwalomana. Apa' i'i waulunama'w akwa'unai nogaga', dao' ina ata' anin mae nahipa'w sisihi'w wapani, a' owa'. Ako'w okom ma'i kogaso' aman mamahonama wapanima, dao' kondaso'ana. Apa' ako'w kondaso' aman Kristen. ⁴⁰Apa' ae' okom mandanda' na'amba. I'i ako'w kogape dowaf, atiasi kondagala a'owa kwikila' dagala kwagaso' amani. Nomanas ae'asi a'i basef ifimba ea' ae' okom mandanda' ma'i ae' wapani efa' Ambal bu'wali Godi nape ae' nihimba'me basef ifimba.

Mafis saham sowa'am sondolalimama wale baso'amunai

8 ¹Dei' ae' a'i i'i basefa mafis saham sowa'am sogopehafa wale anamba baso'amunai. Endilisi, “Apa' hiapai mogawa”, si'i ipa' paga'ias. Gawa inimba atin wafini nagasa'mai waf sanda' du'wanigafi, apa' i'i apa' ukup pipila sahin owan, isimba atiasi sotopalopapa a' motaga Kristen banagepa.^t ²I'i anona aman okom mondanda' mi'i anen gawainai, owa'atin. Anen owa' ata' nogawa andeande'a.^u ³Apa' epen ami okom magamagaila Godi, dao' God nogawa epen inimba ea' ananini.^v

⁴Waf saga' mafis saham sondolali sagaso' wale baso'amunai ina endilisinai, owa'atin. Anen ikwaf atona wafinai. Ina a' wale endilisinai nape, owa'atin. God endilisinai anen atona nape. ⁵Endilisi, hiahaom hiami sofalam saga'i, “Dembamii.” I'i a' endilisi ma amom amamba sofalam soga'i, “Wale god baso'amunai” mope ilifi itap,^w ⁶ea' diamamo hapaimi. God apa' manda' lotumanai atotona nape. Anen God ahamapa, anen atona kofagonama hiahaom hiami. Kofagema apa' magape itap apa'e, manda' maol ananini atin. Ea' Dembinai atotona nape, anen Jisas Krais. Lagol ananigili atogol dei' God nanda' hiahaom hiami mataga mape. Krais atona nanda' apa' mataga mape namepa.

⁷Apa' anis epes gawa inimbai bu'wani akas. Epes isimba fowa' saila wale baso'amunai. Ea' dei' sa' mafis amamba sondolali sagaso' wale baso'amunaiami, ukup asasipi papoma mafis amamba sa'i, “Amamba endilisimi,” ea' sa'am. Malogof fagape ukup nomoni ea' aluguma amamba fihimba'ma esis sanda' waf awafi ea'. Dei' main, ukup asasipi ina kilikalal' sawalagam andeande' sa'am, owa'.^x ⁸Apa' gwa'aimi amamba ina mofa'apa mefe' felefe'ma God, owa'atin. I'i apa' mundaiwa'ma gwa'aisi isimba, apa' ina atiasi mope awepama naep Godi, a i'i moga' mafis isimba ma, apa' ina atiasi motaga be'epa mikila' fowa' magape, owa'atin. Apa' mape wahifipa ma mu'uli inimba fowa'ini naga'i gwa'aisi isimbai.^y

⁹Apa' ipa' solawaipa. Na'amba hiahawes isimba ipa' pape wahifipa panda'asi supisila bo'wagah esis epes isimba owa' banagesa sowa ma waf awafi. ¹⁰Ina' epen negegawai, i'i negafe' ipat atamba sanda' lotuma wale baso'amunai nepe nega' gwa'aisi, ma anin epen okom ananiami owa' banagemama hapifia nigatilina. Atiasi nesa'mai okom ananiami nea' gwa'aisi isimba sagaso' waleasi, a'a owa'? Apa' ina mogawa.^z ¹¹Na'amba gawa ine'ini nehambombaga epen inimba owa' banagemama hapifia, Krais naga' nofa'an negetambili. ¹²Ukup anis sahin owan alipisi ina banagep, owa'. I'i ipa' penda' waf afamba awafi pehambombaga hapifa ukup asasipi,

^t 8:1 Ga 6:3; Ap 15:29 ^u 8:2 Ga 4:9 ^v 8:3 1 Ko 10:19; Ga 4:8; Diu 4:35,39; Diu 6:4

^w 8:5 Mal 2:10; 1 Ko 12:5,6; Ef 4:5,6; Jo 1:3 ^x 8:7 Ro 14:17 ^y 8:8 Ro 14:13-15; Ga 5:13

^z 8:10 Ro 14:15,20

ipa' panda' waf afambai ma Krais atona.^a ¹³Ea' i'i gwa'aisi isimba aga'asi sonda' alipini ae'ani newa ma waf awafi, dao' ae' ina ata' ea' mafis isimba wapani, owa', hapaimi. Na'amba a' enda' anin newa ma waf awafi.

Wafa maol amom aposel manda'ani

9 ¹Dei' ae' a'i ihali'ipa esa'ma nomonas ipe'isi. Ipa' pa'i ae' ape wahifiwi ape aposel ati Dembinai Jisas ea' a'a owa'? Ea' anda' maol inimba atina dei' ipa' pataga Kristen, a'a owa'? Aho' endilisi.^b ²I'i anis epes ukup pandanda' pa'i ae' owa' aposela, diago, hapaisi. Ipa' dao'. Ipa' pahapifa Dembinai pape sisihpama anen. Isimba atis dei' ipa' atipa si'i anol ametal lihimba'ma ipa' hipai pegawe ape aposel anda' maol Dembinai.

³Apa' anis epes sanda'i'ipamae sawaloge. Ea' agwa basef na'amba.^c ⁴Endilisi afa' aposel andeande'ma ogofa' gwa'aisi maina maol afa' wanda'ani.^d ⁵Ea' andeande'ma ogaso' nematawa Kristen ofe' ogalomawa si'i anom aposel maloma amom owapana Dembinai Jisasi maloma Pita manda'as. ⁶Ina andeande'ma ae'i Barnabas atofa onda' maola ogofa' otamba afa'imbai, apa' anis daias ipa' atipa petopalopas pimafiasa otamba. Na'ambai owa'.

⁷Aman mamahonama nanda' maol soldiai anen atona notala gwa'aisi mais ananisi? A epen ami nanda' hiahawes nawas aof ama anen owa' nofa' gwa'aisiafa? O epen ami nimafi bulmakau ma anin owa' nea' nomagofa amoma? Owa'atin endilisi. ⁸Ae' aila ukup epesi atip a'ias na'amba? Owa'atin. Mu'uli God nagaso' Mosesani naga'ias na'amba atin.^e ⁹Moses nanda' basef fagape mu'uli Godi faga'ias na'amba fa'i, "Bulmakau manda' maol mafa'asa olemb wit magandilamami ma'i moga' anom, ipa' ina pesopama malogof amamugufi, owa'i."

Ipa' pa'i God okom mandapoma amom bulmakau atom a'amon? Owa'atin.^f ¹⁰Anen okom ma'i apa' wapani. Aho', basef ifimba fa'iasa apa' atepa. God okom ma'i waf afambai. Epen nenda' maol negala' itap ananipii neloma epen ami nenda' maol negala gwa'aisi sagaof ea'i, anin dao' okom mondanda'ma opaf ananifi ma negefa' hiahawes du'wanisa maol inimba.^g ¹¹Afa' wanda' maol Godi wagape na'amba atin. Afa' wawa hiahawes bu'wasi Ambal bu'unai Godi nagaso'afa asi la'afena ipa'. Ea' ipa' ilama pese'afa anis hiahawes pegatopalopa alop afa'ipi ma isimba ina ahifisa ipa', owa'atin.^h ¹²Ipa' paso'am hiahawes anom amam daiam magawalipipa basef Godii, apa' afa' dei' mama? Afa' wapani peso'afa hiahawes ipe'isi, andeande'. Dei' main, afa' wali' wanda' maol wagatopalopipai.

a 8:12 Ro 14:21 **b** 9:1 2 Ko 3:2-3; Ap 22:17-18, 26:16; 1 Ko 15:8 **c** 9:3 Lu 10:8; 1 Ko 9:13-14 **d** 9:4 Jo 1:42 **e** 9:8 Dii 25:4; 1 Ti 5:18 **f** 9:9 2 Ti 2:6 **g** 9:10 Ro 15:27 **h** 9:11 Ap 20:34-35; 2 Ko 11:9; 1 Ko 13:7

Apa' hiahawes isimba afa' wali' aho'ma ogofa'asi, owa' afa' ina ofa'as. Fowa' dambadamba afa' wali' wagafe'mago ipa' wafi'i wafi'i wataga dei', afa' wandaiwa'ma ogwahefa ufia'wa basef bu'wafi Kraisi. Isimba atis afa' wandaiwa'ma ogofa'as. Ea' isimba atis dei' nimanimi hiami matagamafa.ⁱ

¹³ Dei' ipa' ukup pendanda' ma anif basef. Amom manda' maol ipat lu'unai Godii mofa' gwa'aisi ipat anamba. Ipa' pegawa amom manda' maola belita atamba sondolalima mafisa Goda, amom wapani mofa' mafis du'wa'wanisi belita atamba.^j ¹⁴ Ea' na'amba atin Dembinai nanda' mu'uli inimba nape. Amam ami magawalapa basef bu'wafi Godii, amom ata' mondofa' hiahawesa esis amam nematawa sogofa' basef bu'wafi ma sogatopalopa alop amamupi.^k

¹⁵ Apa' ae' owa' efa' anis hiahawes isimbaia. Ea' dei' wapani ina anda' basef ifimba ma iga'ipipa ae' andeande'ma egefa' anin mae atitina ipa', owa'atin. Andeande'ma ae' ili' endaga'. Ae' andagala anda' maol Godi atopalopepa owa' efa' anis hiahawes isimbaia. Ae' dei' andaiwa'ma anin epen negali'amona dagala ae'ani ma egasa'ma agol ae'agili ma waf afamba, owa'.^l ¹⁶ Apa' ae' ina andagala asa'ma agol ae'agili atogol awalapa basef bu'wafi Godi, owa'atin. Ae' owa' ano'w ufia'wa esopama malagola iga'ipasefa, owa'. Okom ae'ami mahafel endilisi ma a'i inda'ipasef atin. I'i ae' owa' ewalapa basef ifimba bu'wafia, na'amba God nese'e nimanimi lu'wami.^m ¹⁷ I'i okom ae'ami atom enda' maol inimba ananinia, anaf efa' otamba ma maol inimba. Owa' owa'atin. Ae' owa' ano'w ufia'wa, andanda'am atin. Dei' main, inimba anin maol God nase'ean ae' enda'ani. ¹⁸ Anaf efa' hiahaom fasimi maima anda' maol inimba? Hiahaom amamba fasimi na'amba. Ae' anda' waf afamba bu'wafi atef. Hiahawes ae' ila ma egefa'asa maol inimbai, isimba ina efa'as, owa'. Ae' awalapa basef bu'wafi Godi aso'asef dowaf. Ae' ina a' efalasa hiahawes otamba maisa sogase'e si'i mu'uli Godi naga'ias, owa'.ⁿ

Pol nape lafela amam nematawa hiasi ma nogatopalopas

¹⁹ Ae' ina anda' maol ape lafela anin epen, owa'. Ae' ape wahifiwi. Apa' okom ae'ami atom anda' ae' ape si'i agape lafela epes hiasi ma egefa'i hiasi sondahama ikwafa pepel ae'ani sogafe'ma God.^o ²⁰ Isimba atis dei' naep esis Judai ataga si'i Juda, ma igifa'ai anis Juda. Ae' ina ape lafela mu'uli God nagaso' Mosesani, owa'. Apa' naep isimba sagape lafela mu'uli inimbai, ae' wapani ape lafela mu'uli inimba ma efa'i epes isimba sagafe'ma God.^p ²¹ Ea' naep epes isimba sogololama mu'uli inimba owa' Judaisia, ataga si'i epes isimba sogololama mu'uli inimbai, ma efa'i epes

i 9:12 Nam 18:8,31; Diu 18:1-3 **j** 9:13 Mt 10:10; Lu 10:7; Ga 6:6 **k** 9:14 Ap 18:3
l 9:15 Jer 20:9 **m** 9:16 1 Ko 4:1 **n** 9:18 Mt 20:26-27 **o** 9:19 Ap 21:20-26 **p** 9:20 Ga 2:3

isimba sogafe'ma God. Apa' ae' ina okom mase'e mu'uli Godi, owa'atin. Dei' aila mu'uli Kraisi.^q ²²Ama naep epes isimba owa' banagasia, ataga sil'i esis ama egefa'li epes owa' banagasia. Ae' ataga sil'i egefa' waf epes hiasi endondoma ufiawa hiawai ma iwambilai anis sogotanimai. ²³Ae' anda' maol inimba ma egafela agol basef bu'wafi Godi ma anaf egefa' hiahawes isimba bu'wasi blesing epes isimba saila basef ifimbai sogofa'asi eloma anis epes Godi wapani.

Apa' mondasagih banagambela mogofa' hiahaom bu'wami

²⁴Ipa' pegawa epes sasagih sandaloloma atini hiasi sasagih hi'alas safe', apa' atitin nikila'as nefa' prais hiahawes fasisi. Ipa' pegawa isimba a'a owa'? Ea' ipa' wapani pendasagih mehpa pegefa' hiahawes isimba fasisi.^r ²⁵Epes ami sa'i sisagih sigikila'li ma depambema inimbai, sanda' maol numa'wini a'owa' sagwamba alop asasipi sameme'map nimaguf danda. Epes isimba sanda'am na'amba ma sogofa' prais hiahaom bu'wami kwasakwasala magape nogota bandatai. Apa' Kristen manda'ama mogofa' atapim hiahaom fasimi mogape dondoli. ²⁶Isimba atis ae' dei' naep do' okom kilikala' asagih mehpa ikila' hiasi hi'igalas. Ae' ape sil'i anona aman nanda' bokseni nagapa', owa' nokwaha lagof ganigani noha fufutal atol dowadowafa, owa'atin.^s ²⁷Ae' banagewe aha alop ae'api anindifap ahamap usi'ip pape lafela okom ae'ami. Na'amba egawalapa basef bu'wafi ma anis epes daias, apa' anaf owagama ae' ina efa' prais hiahaom fasimi, a' owa'atin.

10 ¹Alipipai, ae' andaiwa'ma ipa' ukup mogamogahepama hiahaom amamba. Esis bafasapa hiasi Israel sape lafela ilagw agwamba gwali'as sagafi'li ea' hiasi safe' bo'wagah asasigahi sowala sambo naoh embel akwahimi.^t ²sawisa ilagw gwaloma naoh embel sagafi'li. Amamba mondola'waifa sogofa' baptais sape sisihis saloma Moses sailana sagafe'.^u ³Ea' esis hiasi sa' gwa'aisi isimba God nagaso'asasi,^v ⁴sa' embel ambalemba God nagaso'asambeli. Aho', sa' embela otam amamba God nagaso'asami nafe' nagalomasi. Otam amamba nondola'waifa Kraisi atona.^w ⁵Apa' owa', God nandaiwa'ma hiasi sagape la'afena esisi. Isimba atis dei' sasa sowala hi'alas itap anamba wafigima fataupigima.^x

⁶Ea' hiahaom amamba hiami mataga mindihimba'mapa sil'i anef ikwafa apa' motolom mogogawama apa' ina a' kowolapa ukup pipila hiahaom awami sil'i esis fowa', owa'i.^y ⁷Ipa' ina kowolepa pila wale baso'amunai sil'i isimba anis fowa' sanda'am, owa'i. Baibel naga'li esis na'amba na'i,

q 9:21 2 Ko 11:29; Ro 11:14 **r** 9:24 Fl 3:14; 2 Ti 4:7-8; 2 Ti 2:4-5; Je 1:12; 1 Pi 5:4

s 9:26 Ro 8:13, 13:14 **t** 10:1 Eks 13:21-22; Eks 14:22-29 **u** 10:2 Eks 16:35 **v** 10:3 Eks

17:6; Nam 20:11 **w** 10:4 Nam 14:26-30; Hi 3:17; Ju 5 **x** 10:5 1 Ko 10:11; Nam 11:4,34

y 10:6 Eks 32:6

“Amam nematawa sape sanda' gwa'aisi embel sa'as sosafel salemb atin sanda' kwala'ap kinde'iaf sa'oh.”^z

⁸ Apa' wapani owa'i monda' waf afamba awafi so'a waulafia si'i isimba anis fowa' sanda'am, ama nemaf atetef esis 23,000-pelais saga' dolamas hi'alas.^a ⁹ Ea' apa' ina mososaefa God mogwambana si'i isimba anis fowa' sagagwambana ma uguf awagufi fahasa esis higilagalas, owa'i.^b ¹⁰ Ipa' ina a' ukup awep pi'i diga wandafugai peloma God si'i isimba anis fowa' sanda'manam God, ma ensel anamba naha epes sagaga'ii nafi'i nahas sagaga' hi'agalas, owa'i.^c

¹¹ Hiahaom amamba hiami magatagama esisi, amamba si'i ikwafa apa' epes dei' magape nogota ata'e felefele'ma ta'i hi'igilatai. Amamba si'i ikwafa apa' mogatoloma solawaipa, na'amba monda' waf awafi si'i esis. ¹² Ea' i'i epen ami niga'i anin atin la'ifin nagalutu banagani, anin a' nendape solawain andeande'. Na'amba newa ma waf awafi.^d ¹³ Gwamba maina nagatagama ipe'i, amamba ina anom daiam, owa'atin. Amamba ea' na'amba atin si'i gwamba hiani nagatagama epes hiasi. God naila basef ananifi endilisifi nanda' hiahawes ananisi datima. Anen ina atiasi ni'i aho'ma anin gwamba netagama ipa' nikila' banagami ipe'imi, owa'atin. Nemaf afamba gwamba nogatagamepa, God nonda' ano'w ufia'wa notopalopepa pegalutu banagepa.^e

**Apa' ina' mila wale baso'amunai noloma ambagof
awami moloma God wapani, owa', hapaimi.**

¹⁴ Ipa' alipipai endilisi ae'ipai, ipa' pekwaha waf afamba pagailafa wale anamba baso'amunaii pewa' alafugaha anen. ¹⁵ Ipa' pegegawai, dei' a'ipipa. Ipa' atipa pewawaloga basef ifimba ae'afi.^f ¹⁶ Kap apamba aman nugumafi lotuwi nogofalo'mapi, apamba na'amba. Apa' manifela Goda kap apamba pakolasa apa' magaloma esimbel Kraisi. Endilisi atis bret atamba apa' magawalotai, atamba takolasepa magaloma alop Kraisi.^g ¹⁷ Bret ea' atotota. Amamba mihimba'mapa amam nematawa hiapai mape si'i alop atotop. Dei' main, apa' hiapai mandaloma ma' bret atotota atamba.^h

¹⁸ Ipa' ukup ata' pendapoma esis Israel. Epes isimba saga' gwa'aisi mafis sondolali ma God belita atambai sandakolas saloma Goda belita atamba.ⁱ ¹⁹ Basef kofagefa doko' aga'ipipafi fa'i main? Gwa'aisi mafis mais sondololima wale baso'amunai endilisisi? O, wale anamba baso'amunai endilisinai? Ae' aga'ias na'amba? Owa'atin.^j ²⁰ Ae' a'ias a'i hiahaom esis sogololoma Godi sondololima wale baso'amunai, ina sondolali ma

^z 10:7 Nam 25:1-9 ^a 10:8 Nam 21:5-6 ^b 10:9 Nam 16:41-49; Hi 3:11,17 ^c 10:10 1 Ko 10:6; 1 Pi 4:7 ^d 10:12 1 Ko 1:9 ^e 10:13 1 Jo 5:21 ^f 10:15 Mt 26:26-28 ^g 10:16 Ro 12:5; Ef 4:16 ^h 10:17 Lev 7:6 ⁱ 10:18 1 Ko 8:4 ^j 10:19 Diu 32:17; Re 9:20

God, owa'atin. Ae' andaiwa'ma ipa' pendakolas pegaloma wale anamba baso'amunai, owa'i.^k ²¹Ipa' ina pea' embela kap Dembinaii poloma kap wale baso'amunai wapani, owa'i. Ea' ina pea' gwa'aisi belita Dembinaii soloma gwa'aisi belita sondolali ma wale baso'amunaiatai wapani, owa'i.^l ²²Apa' ina a' monda' maol mondao'oma mogaloma wale baso'amunai monda' okom Dembinai aoma apa', owa'i. Apa' ina a' mi'i apa' banagipai mikila' Dembinai, owa'i.^m

²³Ipa' pa'i, "Andeande'ma monda' hiahaom mamimami hiami."

Isimba endilisi, apa' ina a' amamba hiami matopalopapa, owa'atin. Ipa' pa'i "Andeande'ma monda' hiahaom mamimami hiami."

Apa' ina hiahaom hiami manda'apa mataga banagepa ma hapif, owa'atin.ⁿ

²⁴Ipa' ina a' ukup pepoma ipa' atipa pindumafuma pepe andeande', owa'. Ipa' ukup pendapoma anis daias wapani ma petopalopas sogape andeande'.

²⁵Ambegw hiami mafisim sagatalom stowai, amamba ipa' penda'am. Ina a' nomonas sope hiahias pihahali'mam na'ana'a, owa'i.^o

²⁶Dei' main, "Itap apa'e paloma hiahaom hiami hi'alam amamba Dembinaii atom."^p

²⁷I'i anin epen owa' nogahapifa Kraisia nefalepa ni'i pefe' peloman pega' gwa'aisi ma pi'i pegafe'ma, dao' andeande'. Pefe' pea' gwa'aisi hiasi anin nandandombasa nagasi'ipasi. Ipa' ina a' nomonas sotagamepa hiahias pihahali'anas na'ana'a, owa'i.^q ²⁸Apa' i'i anin epen nili' ni'lipipa niga'i, "Mafis isimba sondolalima wale baso'amunaisi", dao' ipa' apegawa basef ananifi ina pea'as, owa'i, hapaisi. Ipa' pinda'i uwahipigama epen inimba. ²⁹Ae' ina a'i peme' malogof fagape ukup ipe'ipi nomoni pilas, owa'. A'i pindaila malagol gagape okom nomon epen inimba naga'ipipai. Na'amba anin epen daian ni'i, "Ae' agape wahifiwai. Dei' maina okom anin epen owa' banagania mogasindi'amaona ae'?"^r ³⁰I'i ae' inifela Goda ega'as, dei' maina anin epen nesopama ae' ma ega' mafis isimba aganifela Godasi? Na'ambai ae' andaiwa'."^s

³¹Dei' egwa basef epen inimbai. I'i ipa' pi'i pega' gwa'aisi embel mais a penda' hiahawes mamahisa, penda'asa pegasa'ma agol Godi atogol lu'wagol.^t ³²Ipa' a' ukup pendapoma epes hiasi hi'indaldas, esis Juda soloma esis owa' Judaisia, ea' soloma amam nematawa sios isimba Godi. Ea' ipa' ina a' penda' anef waf fenda' esis sogowama waf awafi, owa'i.^u ³³Si'i ae' wapani, anda' hiahawes hiasi ma egatopalopa epes hiasi ma ukup piga'i waf bu'wafi hiafi ae' anda'afi. Ae' ina anda'as atopalopa ae' imafi ae' atowe, owa'. Anda'asa agatopalopa amam nematawa hiasi ma God nofa'as nokwahomas waf awafi sogotanimai.

k 10:20 2 Ko 6:15-16 **l** 10:21 Diu 32:21 **m** 10:22 1 Ko 6:12 **n** 10:23 Ro 15:2

o 10:25 Sam 24:1 **p** 10:26 Lu 10:8 **q** 10:27 1 Ko 8:7 **r** 10:29 1 Ti 4:4 **s** 10:30 Kl 3:17

t 10:31 Ro 14:13 **u** 10:32 1 Ko 9:20-22

11 ¹Ipa' pendandepa waf ae'afi pila ae' si'i ae' andandepa waf Kraisi ma agailana.^v

Waf sogapalo' balagah sanda' lotu

²Lifilafi ipa' ukup pandanda'ma ae' paila basef ifimba hiafi agasi'ipafi. Basef ifimba egefa'afi dei' a'ipipaef ipa'. Isimba atis dei' anifelipa a'i panda' waf bu'wafi endilisi.^w

³Dei' a'i ipa' pegawa basef ifimba. Agilinai amam hiamii anen Kraisi atona ea' agilinai ako'wanai waulunama'w atona ea' agilinai Kraisi God atona. ⁴I'i aman ami Ambal bu'unai Godi nosa'mana ni'ipasa basef Godi si'i profet a'a nondabeten ama siti anen nopalo' balaga, aman anamba atiasi a' nonda' agol Kraisi agilinai ananinai gowala. ⁵Ea' nemata'w ami wapani Ambal Godi nosa'makwa kuga'ipasa basef Godi si'i profet a'a kondabeten ama owa' kopalo' balaga ako'ugaia, ako'w wapani kwanda' ambal waulunama'wi aol. Isimba ea' na'amba atin si'i kwagando balaga ako'ugai hi'agalaga. ⁶I'i nematawa owa' opalo' balagah awaugahia, awo a' ondatopag'agah bandagah. Waf apa' hiapai fagape na'amba. I'i ambagof awagofa ogatopag'agah bandagah a'a ondowagah hi'igalagah, apa' ma'i waf afamba awafi fanda' nematawa ambagof awagufi. Dei' isimba atis andeande'ma awo ondopalo'agah.^x

⁷Amam owa'i mopalo' balagah amamugahia. Dei' main, God nanda' amam mandati si'i anen ama mogawalapai banagami mogogala'i ananiami. Apa' nematawa wagawalapai banagami mogogala'i amami.^y

⁸Dei' main, God ina nanda' amana alop nemata'wi, owa'atin. Anen nanda' nemata'wa alop amani.^z ⁹Ea' isimba wapani, God ina okom mandanda'ma nemata'w dei' nanda' amana nogatopalopa ako'w, owa'atin. Anen okom mapoma aman dei' nanda' nemata'wa kogatopalopana. ¹⁰Isimba atis dei' nematawa ondapalo' balagah awaugahi ondola'waifa ogape lafela amom wauhupawa awoumi. Awo opalo'agah ondambaho'agaha ombal begahawa ma amom ensel mogatolowa.

¹¹Apa' magape sisihipama Dembinaii magape na'amba. Ina nemata'w ato'w kope aman aka'w o aman atona nope nemata'w akana, owa'atin. ¹²God nanda' nemata'wa alop amani ea' na'amba atin dei' nanda' amam mataga alop nematawai. Apa' God kofagonama hiahaom amamba hiami hi'alam.

¹³Dei' ipa' atipa ata' pendawaloga basef ifimba. I'i nematawa owa' opalo' balagah awaugahi onda' betena Goda, isimba andeande' a'a owa'? ¹⁴Waf ape'ifi amam nematawai atef ea' fihimba'mepa' na'amba. I'i amam balagah laugahi, isimba sanda'am ambagof awagof. ¹⁵Apa' i'i nematawa

^v 11:1 1 Ko 4:16 ^w 11:2 Jen 3:16; Ef 5:23; 1 Ko 3:23 ^x 11:6 Jen 1:26-27; Je 3:9
^y 11:7 Jen 2:21-23; 1 Ti 2:13 ^z 11:8 Jen 2:18

balagah hopaowa, dao' andeande', balagah si'i sosaf bu'wafi awaufi. Dei' main, God atona naso'awa balagah laugahi awo ma hogaso'ala balagah awaugahi. ¹⁶Apa' i'i epen ami ni'i basef negapa'efa hiahawes isimba, anin a' nendegawa, apa' ina maila anef waf daiaf, owa'atin. Maila waf afambai atef. Ea' esis sios amam nematawa Godi hiasi dei' sailaf na'amba atin.

Esis Korin sahambombaga gwa'aisi Dembinaii

¹⁷Ae' a'i ese'epa anin mu'uli ipa', apa' ae' ina esa'ma agof ipe'igufi, owa'atin. Nogota atamba pandakolas panda' lotu, dakolas ipe'ini nahambombagepa.^a ¹⁸A'i ili' iga'iasi isimba. Nogota atamba ipa' pandakolas panda' lotu, ipa' pandawawal atin. Ae' agame' basefa ipa' na'amba. Ea' ae' okom ma'i kwasakwasala a' endilisi ipa' pandawawal.^b ¹⁹Endilisi, ipa' pandawawal atin pa'i waf afamba bu'wafi ma epes mamahisa sagaila basef endilisi sotaga sondosali alihis? Owa'atin endilisi. ²⁰Afamba ipa' hipai pandakolasa, ipa' ina pefa' gwa'aisi Dembinaii, owa'atin. ²¹Ipa' hipai atona atin pali' ulu ulal pa' gwa'aisi ipe'isi atis. Ea' anin nolomahan nape, a anin daian na' embel wain hiani okom mando molan.^c ²²Ipa' ifagw akepama pega' gwa'aisi embel mais? O ipa' pa'i sios amam nematawa Godi isimba awasi falafisi atis, a'a? Ipa' pa'i penda' anis epes gwa'aisi akasi ambagof awagof iwaniguf? Dei' atiasi i'i basef maifa ipa'? Isa'ma agof ipe'igufi? Owa'atin. Hiahawes isimba ipa' panda'asi ae' ina anifelipa asa'ma agof ipe'igufi, owa'.

Dembinaii Jisas naso'ama gwa'aisi ananisi amam alipumi

²³Basef ifimba ae' agasi'ipafi ifimba ae' efa'efa Dembinaii atona. Ifimba na'amba. Owamb ambamba Judas nagaso'ama Jisas nogafe' lagof amom boumii, ma owamb ambamba Dembinaii Jisas nasa'ma bret ²⁴ea' nanifela God nawalota na'i, "Amamba alop ae'api, ase'epapa agatopalopepa'. Ipa' penda'as ea' na'amba atin ukup pendanda'ma ae'."^d

²⁵Amom ma'as ea', anen nasa'mai anop kap embel bagalapi nanda'as na'amba atin na'i, "Kap apamba basef banagafi dambaifi ae'afi agala' lapafi. Ametala basef ifimba esimbel ae'ambeli atembel balo bagatopalopipai. Nimaguf hiafi danda ipa' penda' isimba pega' embel, penda'as na'amba ma ukup pegapoma ae'."

Fowa' Jisas naga'ipa alipumi ananisi na'amba. ²⁶Nimaguf hiafi ipa' pega' breti kap embel isimba ma, ipa' pewalapa basefa Dembinaii nagaga' fetaga alihif fefe' fefe' fetagama nemaf anen nugafi'afii.^e

Epen ami negahambombaga gwa'aisi Dembinaii, kofagema ananisi atom

²⁷I'i anin epen owa' okom mili' mope andeande'ma nea' gwa'aisi isimba breti embela kap Dembinaii dowadowaf, anin nanda' waf awafi

a 11:17 1 Ko 1:10-12; 1 Ko 3:3 **b** 11:18 Ditu 13:3; 1 Jo 2:19 **c** 11:21 Je 2:5-6
d 11:24 Eks 24:6-8; Sek 9:11; Hi 8:8-13 **e** 11:26 Hi 10:29

ma alop paloma esimbel Dembinaii, ea' epen inimba kofagema mopoma anin atin.^f ²⁸ Apa' hiapai ata' muli' mondowaloga ukupi nomonas ape'isi atis ama main, mea' breti embel kap isimba. ²⁹ Dei' main, i'i epen owa' nowaloga basef kofagefa ma alop Dembinai ma anin nea' gwa'aisi embel dowafa, kofagema epen inimbai atom. ³⁰ Kofagema ea' amamba atom dei' amam nematawa hiasi la'afena ipa' pupulis, owa' banagesa, ea' aowas naninani hiani anis saga'ma waf afambai. ³¹ I'i apa' muli' nomonas kilikalama mowawaloga nomonas ape'isi atis andeand'ai, atiasi ina anom kofagema motagama apa', owa'atin.^g ³² Apa' i'i Dembinai nagahihi' waf ape'ifima nogagwa waf awafima apa'a, isimba anen nasa'apa bumbulita nasindi'amonapa ma anaf ina higililapa moloma epes sagaila waf itapafii, owa'atin.

³³ Ea' dei' ipa' alipipai ae'ipai, i'i ipa' pekolata pega' gwa'aisi Dembinaii, ipa' ata' pepe pehafa anis sili'. ³⁴ I'i anin epen ami nolomahan, anin ata' nili' nenda'ago gwa'aisi ipat ananitai. Na'amba dakolas ipe'ini newalapai basef kota ipa'.

Basef ifimba du'wanif fagapani ata' owa' iga'ipipafia, nemaf mamahefa egafe'mago ipa', dao' i'ipipaef isindi'amonepa.

Presen hiahaom fasimi Ambal bu'unai Godi nagaso'apami

12 ¹ Ipa' alipipai, ae' a'i enda'mepago basef ifimba ma presen hiahaom fasimi Ambal bu'unai Godi nagase'epam ipa' atona atini. Dei' main, andaiwa'ma anipa ipa' ukup pegelelaipa ma amamba.^h ² Ipa' pegawa ea' ma fowa' ipa' ata' pagape aopama waf awafi pegelelama God, nogota atamba ipa' ukup paila wale baso'amumi maim magahondo'ipai, mememi owa' muga'i kwasakwasalaia. ³ Ea' ipa' pendegawa epen mamahina Ambal bu'unai Godi nasa'man naga'i basefi, ina atiasi ni'i basef ni'i, "Jisas anaf higililana," owa'atin. Ea' epen ami Ambal bu'unai Godi akani, anin ina atiasi ni'i basef ni'i, "Jisas anen Dembinai," owa'atin.^j

⁴ Presen hiahaom fasimi Ambal bu'unai Godi nagaso'apam dowafi, amamba hiami mamimami. Amamba Ambal Godi atona naso'apam.^k ⁵ Maol Dembinai hiani naninani nape, apa' Dembinai atotona nape numafian. ⁶ Waf hiafi fafifafi manda' maolafi, apa' God ea' anamba atotona naso'apa pepel epes hiapai ma la'ifipa monda' maol inimba hiani hi'igalan.^l

⁷ Ambal bu'unai Godi nawalapa pepel ananinai ma epes hiasi atona atina nagatopalopa hiasi hi'agalas. ⁸ Epen atitin Ambal bu'unai Godi naso'an pepela nigihimba'masa gawa hiani bu'wani naninani ma

^f 11:27 Mt 26:22; 2 Ko 13:5 ^g 11:31 Hi 12:5-6 ^h 12:1 Hab 2:18-19 ⁱ 12:2 1 Jo 4:2-3
^j 12:3 Ro 12:6; Ef 4:4 ^k 12:4 Ef 4:11 ^l 12:6 1 Ko 14:26

negawalapa epes hiasi. Ea' anin daian Ambal bu'wali Godi anamba atona naso'an pepela negawalapa basef kofagefa waf Godi ma atiasi esis amam nematawa sogogawana andeande'. ⁹Ea' anin epen daian Ambal bu'unai Godi atona natopalopana nagahapifa God banagambel nanda' maol ananini andeande'. Ea' anin epen nefa' pepela netopalopa aowas nanda'asi sogataga bo'wes. Ambal bu'winai ea' anamba atona.^m ¹⁰A anin epen Ambal Godi natopalopan naso'an pepela nenda' hiahaom banagami si'i God nanda'ami. Apa' anin daian Ambal Godi nasa'mana niga'i basef Godi. Anin daian nefa' gawa ma negawawaloga spirit ambagof mamimami hiami, bu'wami a'a awami. A anin daian negawama niga'i diga naninani daiana hianai. Ea' anin daian negawama negambema basefa diga anamba naninani daiana.ⁿ ¹¹Ambal bu'unai Godi anamba atona nanda' maol nawalapa presen hiahaom amamba hiami. Ama okom ananiami atom naso'as presen hiahaom fasimi amamba mafe'ma epes hiasi atona atin.^o

Alop wa'a wa'apa alop atotop pondola'waifa presen hiami fasimi mamimami

¹²Presen hiami fasimi mamimami si'i alop apa' epesi. Alop apa' epesi atifip, apa' sa'osa'opa hiapi ea' alop apamba hiapi lu'up sa'op pafe' pail alop si'ip atotop. Krai wapani na'amba atin.^p ¹³Dei' main, apa' hiapai mofa' sa'ofa Ambal bu'unai Godi atotona. Nanda'apa mataga alop atotop, esis Juda saloma owa' Judaisia saloma esis agof akasi a esis sagape wahifisi, owa' sogape lafela anis daiasia wapani. Apa' hiapai mofa' Ambal Godi atotona nape si'ina nelelemb ape'ilimbi.

¹⁴Apa' mogawa alop ina atifiminap, owa'atin. Alop sa'osa'opa hiapi. ¹⁵I'i bo'waga gi'ias gi'i, "Ae' ina a' lagol agape alop si'ipi, owa'." I'i bo'aga agamba giga'i basef na'ambaifi, ina andeande', owa'. Basef ifimbai hapaifi. Bo'waga gandala gape alop si'ip apamba atop.

¹⁶Ea' aliga wapani gi'ias gi'i, "Ae' ina a' naep ape alop si'ip, owa'." I'i aliga giga'ias na'ambai, ina andeande' owa', basef ifimba hapaifi. Aliga gandala gape alop si'ip apamba atop. ¹⁷I'i alop hiapi si'ip ea' naep atipap hi'ilapei, dei' pogahembe' pome' basef pi'imama? Owa'atin. I'i alop hiapi si'ipa aligah atogah hopaop hi'ilapai, dei' pogahoma alogw pome'agw pi'imama? ¹⁸Apa' alop ina pataga si'i na'amba, owa'atin. God atona fowa' nogawa okom mandanda'ma alop atona atin lu'up sa'op dei' nanda'ap pape pandahama si'i okom ananiami atom maga'ias. ¹⁹I'i alop si'ipa anop alop atifip popaop hi'ilapai, dei' atiasi alop apamba si'ip pope mama? Owa'atin. ²⁰Apa' alop ina pataga pandanda' na'amba, owa'. Alop wa'awa'ap sa'osa'opa hiapi, apa' alop si'ip atifip.

m 12:9 Ap 2:4; 1 Ko 14:5 **n** 12:10 Ro 12:3; 1 Ko 7:7 **o** 12:11 1 Ko 10:17 **p** 12:12 Ga 3:28

²¹Naep ina la'ifipa pi'ipa lagof piga'i, "Afa' wandaiwa'ma ipa' pepe pegalomafa. Afa' atofa ogape, dao' andeande!"

Ea' balaga wapani ina la'ifigama gi'ipa bo'wagah giga'i, "Ae' andaiwa'ma ipa' pepe pegalome, owa'. Ae' atowe epe, dao' andeande!" Owa'atin.

²²Alop apamba wa'awa'ap falafalafupa apa' maga'i owa' banagapia, i'i apamba owa' pondala popea, atiasi alop apamba si'ip ina potaga banagep, owa'atin endilisi. ²³Ea' alop apamba wa'ap apa' ambagof awagofapi, apa' mofalo'map a'owa' mumafiap datima. ²⁴Apa' alop wa'ap owa' ambagof awagofapia apamba apa' ina mofalo'map mumafiap na'amba, owa'. Alop apamba ila ma pogape dowaf. God atona nasa alop apamba wa'owa'op hiapi sa pail atogon pataga atifip. Anop wa'ap agof akapi apa' anen nofalap agof lu'wagufi fandandap. ²⁵Anen nanda'as na'amba ma alop apamba ina atiasi pondawal wa'awa'ap, owa'atin. Alop apamba hiapi wa'awa'ap a' ukup pindaima atin pundumafuma andeande' na'amba atin. ²⁶Ama i'i alop wa'ap pome' akepehap, alop hiapi si'ip atiasi pome' akef na'amba atin. Apa' i'i anis epes sinifela wa'ap, hiapi si'ip sonohap hi'ilap polomap.^q

²⁷Isimba atis dei' ipa' hipai pape alop Kraisi si'ip. Ea' ipa' hipai atona atin alop wa'awa'ap ananipi.^r ²⁸God nahapona anis epes ananisi sape na'amba ma sios. Magali'i aposel, sagagi'i profet, sagafe'ma wanifi, esis tisa sagawalipasa basef kofagefa Godii. Ama main, sagagi'ma amambai epes isimba sanda' betena sanda' banagami si'i God nanda'ami. Ea' epes isimba sanda' awasisi bo'wes wapani, a esis isimba sagatopalopa anis daiasi, saloma amom mugumafi maol siosi naninani hianii, ea' saloma isimba sogawa ma siga'i diga naninani daiana hianai. ²⁹Dei' ipa' ukup pandanda' pegawa pa'imama? Ipa' pa'i amom hiami hi'alam mape aposel atom? Pa'i amom hiami hi'alam mape profet atom? Ipa' pa'i amom hiami hi'alam mape tisa atom? A pa'i esis hiasi hi'alas sanda' hiahaom banagami si'i God nanda'ami? ³⁰Pa'i esis hiasi hi'alas sofa' presen hiahaom fasimi ma sonda' awasisi sogotaga bo'wes wapani? A pa'i esis hiasi hi'alas sogawa ma siga'i diga naninani daiana hianai? Pa'i hiasi hi'alas sogawa ma sogambema basefa diga anamba naninani daiana? Owa'atin endilisi.^s ³¹Apa' ipa' hipai a' ukup kilikala' pindapindaila pegefa' presen hiahaom fasimi magali'i.

Ea' dei' a'i ihimba'mepa ano'w ufia'w atoto'w bo'ombo'okw kwikila' endilisi presen inimba hiani.

Apa' ukup pelele' pindaila anis amam nematawa endilisi

13 ¹I'i ae' egawa ma iga'i diga naninani epesi goloma enseli wapani, ma ae' owa' okom mimilas ese'asa nembel etopalopasa,

malogol diga ae'agai falafugai atoga si'i sagaha olefi wata sagala' dowaf.^t ²I'i Ambal bu'unai Godi nose'e presen hiahaom fasimi nosa'me ma egawalipasa basef Godi ma egegawa okom hiami Godi mape mandamabahi' hi'igalam, ama egegawa gawa hiani hi'igalan wapani, ma igahapifa God banagambel endilisi ma la'ifiwi esapa' halafutagw gogafe' gani do'wan, apa' ae' owa' okom mimila esis amam nematawa endilisi, ae' falafuwai atowe.^u ³I'i ae' egaso'asa hiahaom hiami ae'ami hi'igalama esis isimba kwahusa hiahawesi ma enda' maol Godi iga'i aho'ma anis epes sandaiwa'ma Godi si'i sehe sogaofe nif egaga'. Apa' ae' owa' okom mimilas ese'as nembela, ea' hapaimi. Anaf hiahaom amamba hiami ina motopalope molefate kwasakwasala, owa'atin endilisi.

⁴Epen mamahina okom magaila anis epes daias endilisi, anin nanda' waf bu'wafi na'amba. Anin ina kwafalis nagwamasa waf awafi esis sanda'manaf anini, owa'atin. Anin nape natitilis. Anin nati epes hiasi uwahipis natopalopas. Anin ina kowagalana epes hiahaom hiamiisii, owa'atin. Ea' ina nagasa'ma agol ananigili atigili, a anin ina okom maga'i anin atini, owa'atin.^v ⁵Anin saisailan atin nagape andeande'i. Anin ina okom magapoma hiahawes ananisi a'owa'i, owa'atin. Anin ina okom numbutim kwafalisi, owa'. Ea' ina okom magapoma waf awafi anis daias sanda'manafi, owa'atin.^w ⁶Anin ina nandagala ma waf awafi ikiakafi, owa'atin. Anin nandagala ma waf endilisifi bu'wafi atef.^x ⁷Nimaguf hiafi dondol anin nanda' waf afamba na'amba. Anin nembel bape awanembela nemaf mamahefa negame' nimanimi akafimi hiami. Anin ina nagandina anis epes kwafalisa waf asasifi, owa'. Anin nahapifa God endilisi nape nehafana ma nogatopalopa esis sogaloma anin wapani. Anin nalutu banagena ma nimanimi akafimi magatagaman.

⁸Waf afamba ukup pagapagaila anis daias endilisi, afambai anaf ina higililaf, owa'atin endilisi. Apa' waf afamba Ambal Godi nasa'mapa ma mogowalapa basef ananifi, afamba anaf higililaf hi'ilaf. Presen inimba hiahaom fasimi ma epes sogawa saga'i diga naninani hiana haonai, diga anamba hiana haonai anaf hi'ilana. Presen inimba ma epes sogogawa gawa ma waf Godi, gawa inimbai anaf hi'ilan wapani. ⁹Dei' main, dei' apa' ata' mogawa gawa du'wanin atin. Presen inimba Ambal bu'unai Godi nasa'masa sogawalapa basef ananifi si'i profet, basef ifimba wapani ata' du'wanif atif. ¹⁰Apa' anaf hiahaom God okom ma'i motaga mugagi' endilisii mogataga, nemaf afamba hiahaom amamba dei' mogataga wa'awa'ami atiasi hi'ilam. ¹¹Fowa' ae' ata' agape si'i awani a'i basef si'i awani. Ae' ameme'ma hiahawes si'i awani. Apa' afamba agataga dambewe, akwaha waf afamba awanii.^y ¹²Dei' apa' mati hiahaom mataga

^t 13:1 Mt 17:20 ^u 13:2 Mt 6:2 ^v 13:4 Fl 2:4 ^w 13:5 Ro 12:9 ^x 13:6 Ro 15:1; 1 Pi 4:8; 1 Ko 9:12 ^y 13:11 2 Ko 5:7; Je 1:23

ea', apa' ina mandawalap alihim a'owa', ata' owa'. Mataga si'i mapelaga embel magati walofam atin. Apa' anaf owagama nemaf dondo'afi feगतaga, dao' mundatima nogohnaep alihipa. Dei' ata' egawa wa'awa'as atis. Apa' nemaf afamba egawa isimba endilisi si'i God nogogawe.^z

¹³Dei' waf wanifif fape, afamba na'amba. Waf mogahapifa Kraisafi faloma waf mope mogahafa Godafi, waf ukup pagapagailas endilisiafi. Waf afamba wanifif. Apa' fagali' endilisii, waf ukup pagapagailas endilisi.

Presen hiahaom fasimi Ambal bu'unai Godi nagaso'apami

14 ¹Ipa' banagepa pili' ukup pindaila epes hiasi pese'asa nelelemb esis. Ea' ukup ipe'ipi pendahafel endilisi ma pegefa' presen hiahaom fasimi Ambal bu'unai Godi nagase'epami. Apa' presen nagali'i ma ipa' penda' maol dindinipa pegefa'ani, inimba na'amba. Presen Ambal Godi nosa'mepa ma pegawalapa basef Godi si'i profet.^a ²Apa' mogawa epen ami na'i basefa' anoga diga daiagai, anin ina naso'as basef epes, owa'. Anin na'ipa God atona. Dei' main, ina anin epen negawa diga agamba, owa'atin. Banagami Ambal Godi atom anin na'i basef ifimba fowa' fape fandambahi'i. ³Apa' epen ami Ambal Godi nasa'mana naga'i basef Godi si'i profeti, epen inimbai na'ipasef nowa' banaga hapif asasini ea' fasa'masa sonda' waf fasifi fenda' opalef asasilifi awanelef. ⁴Epen ami naga'i basefa anoga diga daiagai, anin newa' banaga opaf ananifi atof. Apa' epen ami Ambal Godi nasa'man nawalapa basef Godi si'i profet, inimba newa' banaga esis sios amam nematawa Kristen.^b ⁵Ae' okom ma'i ipa' hipai hi'ilipa pi'i basefa anoga diga daiaga. Apa' epen ami Ambal Godi nasa'mana newalapa basef Godi si'i profet, anin nikila' epen inimba naga'i basefa anoga diga daiagai owa' nembemef ni'if alihifa. Dei' main, i'i epen inimba owa' nembemef ni'if alihifa, basef ifimba ina fewa' banaga esis sios amam nematawa Kristen sgame'afi, owa'atin. Apa' i'i negambemef alihifa, dao' basef ifimba fewa' banagas.

⁶Alipipai, ipa' ukup pendame' basef ifimba andeande'. I'i ae' efe'mago ipa' ma ega'i basefa anoga diga daiaga, atiasi etopalopepa ewa' banagaipa i'imama? Owa'atin. Apa' i'i embemef iga'if, dao' ese'epa anif basef God nigihimba'miefi ea' ese'epa gawa fasini ipa' a'a iwalipipama basef kofagefa Godi si'i profeta Ambal Godi nosa'me egawalipipafi.

Apa' mondawalapa basef Godi alihifa diga

⁷Hiahawes ambal akasi, si'i batagwi gita, amamba ea' na'amba atin si'i diga agamba hiagai. I'i amom owa' mogal melef monda' maguf fafifafi fetagaia, apa' atiasi mogahembe' mogawa maguf amamufi alihif mi'imama? Owa'atin. ⁸I'i bugel alof owa' fogal fi'i alihifa, amom monda'

^z 13:12 1 Te 1:3; 1 Jo 4:16 **a** 14:1 1 Ko 12:31; 1 Ko 14:39 **b** 14:4 Nam 11:29

wandafi silisilawi mope mondandombola wandaf mi'imama? Owa'atin. ⁹Ipa' wapani na'amba atin. Ipa' i'i pi'i basefa anoga diga esis owa' sogogawagaia, atiasi sogawa basef ifimba kofagefa si'imama? Owa'atin. Atiasi basef ipe'ifi fefe' higililif dowaf. ¹⁰Endilisi, diga hiaga haoga gape itap apa'e. Apa' ina anoga diga falafugai dowaf, owa'atin. Basef kofagefa fape diga gagigagi hiagai. ¹¹Ae' i'i owa' egawa basef kofagefa anin epen naga'iafia, atiasi anin okom mopoma ae' ni'i ae' epen aga'i anoga diga anambel wambeli. Ea' ae' wapani okom mapoma anin i'i naga'i anoga diga anambel wambili. ¹²Ipa' wapani na'amba atin. Ipa' ukup pa'i a'owa' ma pegefa' presen hiahaom fasimi Ambal Godi nagase'epami. Ea' ipa' dao' pendanda' maal banagambel endilisi ma pegefa' presen inimbai negewa' banaga hapifa siosi.

¹³Ea' epen ami naga'i basefa anoga diga daiagai anin nendanda' betena Goda nogoso'an gawa negambema basefa diga agamba. ¹⁴Dei' main, i'i enda' betena anoga diga daiaga, ambal ae'ali atol landabeten, apa' okom ae'ami mape dowaf. ^c ¹⁵Ea' dei' atiasi enda'as i'imama? Ae' endanda' betena ambal ae'ali eloma okom ae'ami wapani. Ae' endanda' awalefa ambal ae'ali eloma okom ae'ami wapani. ¹⁶⁻¹⁷I'i ipa' pinifela Goda ukup ipe'ipi atip, ama anin epen owa' nefa' anin presen hiahaom fasimi Ambal Godi nagase'epamia, dei' atiasi anin negawa ni'imama ma beten inimba ipe'ini ma niga'i endilisi? Owa'atin. Endilisi, i'i ipa' pendabeten pi'i basef fasifi a'owa', ina atiasi pewa' banaga nembela epen inimbai, owa'atin. Dei' main, anin ina negawa basef ifimba ipa' paga'iefi, owa'. ¹⁸Ae' anifela God nimaguf hiafi ma ae' aga'i basefa anoga diga daiaga. Ipa' ina la'ifipama penda'ope, owa'. ¹⁹Apa' eloma esis sios mondakolas, ae' a'i i'i basefa amef bandafi wanifif biafifa okom ae'ami iwalipa esisa sogogawef. Ama ae' i'i basefa amef laulaufi fetaga hihif 10,000 pelaifa anoga diga daiaga gagasi'i, ea' hapaifi, falafifi atif. ^d

²⁰Ipa' alipipai, ipa' ina pepe ukup pelapefe' si'i awasi, hapaimi. Waf awafi, dao' ipa' ukup be'ep pepe andeande' ukup pese'epaf si'i awasi. Apa' nomonas ipe'isi sondataga si'i epes dambesi. ^e ²¹Anif basefa mu'uli Godi fagail buki faga'i na'amba fa'i,

“Dembina na'i, anaf Ae' enda' anis epes anota wambota saga'i anoga diga daiagai isa'mas si'lipasa basef ae'afi epes isimba ae'asi, apa' esis ina atiasi sila basef ifimba, owa'atin.”

²²Dei' apa' mogawa presen inimba paga'i basefa anoga diga daiaga, inimba ina ametal God nanda'ana esis sagahapifanai, owa'. Anen nanda'ana epes isimba owa' sogahapifanaia. Apa' presen inimba Ambal bu'unai Godi nasa'mepa pawalapa basef ananifi si'i profet, inimba ina

c 14:14 Ef 5:19 **d** 14:19 Ef 4:14; Fl 3:15 **e** 14:20 Ais 28:11-12

ametal God nagaso'asan epes isimba owa' sogahapifanaia, owa'. Inimba ametal isimba sagahapifanai atis.^f

²³Ea' i'i esis amam nematawa sios hiasi sondakolas atogona ama ipa' hipai a' pi'i basefa anoga diga daiagama anis epes owa' sogofa' presen inimbaia o anis owa' sogahapifa Kraisia sifi'i sope sogalomepa, atiasi asi'i, "Ipa' ukup magahipai."^g

²⁴Apa' i'i Ambal bu'unai Godi nasa'ma ipa' hipai ma pegawalapa basef Godi si'i profet ama i'i anin epen owa' nogohapifa Kraisia o owa' negegawa basef Godi andeande'ia nifi'i negawis, ama basef ipa' hipai atiasi feha nembel epen inimbai ea' fewaloga opaf ananifi ma waf maif awafi fagapani.^h ²⁵Basef hiafi fape fandambaho' okom ananimii, ifimba atiasi afetaga fendawalap alihifa anin nifi'i nindiwa nembawa nitimalo' nefela agol Godi nowalapa basef na'amba ni'i, "Endilisi atis, God nape nalomepa."ⁱ

Waf hiafi lotufi a' fendataga andeande'

²⁶Ipa' alipipai, dei' basef ifimba akutaifi ae'afi fagape na'amba. Nema afamba pendakolas, presen inimba hiani Ambal Godi nagaso'apani napoma ipa' hipai na'amba. Anin epen nenda' anaf awaf, anin daian ni'i anif basef Godi niwalipipa, a anin God naso'ana anif basefa negawalapef, ea' anin daian negawa ma niga'i anoga diga daiaga, a anin daian negawa ma negambema basef ifimba. Ipa' pendanda' hiahaom amamba hiami ma pegewa' banaga hapif esis amam nematawa sios. ²⁷I'i anis ukup pehafela siga'i basefa anoga diga daiaga, bias a'a wanis sinda'i basef atona atin. Ea' ma'wis isimba. Apa' ina a' si'if atef, owa'i. Sinda'if atona atin. Ifimba ea' ma'uf. Ea' anin epen atitin a' nendambema basef ifimba. ²⁸Ama i'i owa' anin epena negambemefa, dao' epen inimba na'i niga'i basefa anoga digai a' nendasopama malogol ananigili ma basef ifimba ma esis sandakolasa. Bola anin atin ni'if nendaloma God.^j

²⁹Apa' amom profet biam o wanom Ambal Godi nasa'mama mogawalapa basef ananifi, amom a' mondawalapef. Ea' anom daiam mowawaloga basef ifimba. ³⁰I'i anin epen tol nepe lotu neme' basefa God nihimba'mana anif basefa epen inimba, dao' aman anamba nali' nalutu nagawalapa basefi a' nondasopama malogol. ³¹Ipa' hipai Ambal Godi nasa'mepa pawalapa basef Godi si'i profet, ipa' pewalapef atona atin pi'if daindai ma epes hiasi seme'ef solafefa fegewa' banaga hapif asasini. ³²Epes ami sogofa' presen inimba Ambal Godi nasa'masa sogawalapa basef ananifi si'i profet, a' sundumafi presen inimba andeande'. ³³Dei' main, God ina nanda' waf uluwalifi, owa'atin. Anen nanda'waf usi'ifi opalef atifilif fagape awanelifi.

^f 14:22 Ap 2:13 ^g 14:23 Jo 16:8 ^h 14:24 Ais 45:14; Sek 8:23; Jo 4:19 ⁱ 14:25 1 Ko 12:8-10; Ef 4:12 ^j 14:28 Ap 17:11; 1 Te 5:21

Apa' sios amam nematawa Kristen sunduwa'anima sogape,^k ³⁴ awo nematawa ina a' ulutu wi'i basef, owa'i. Awo osopama malogof ope dowaf. Sios apa' amam nematawa Godi waf ea' afamba atef. Nematawa ina a' ope wili'ma sios, owa'i. Ondape lafel si'i mu'uli Godi naga'ias. ³⁵ I'i awo wi'i ogogawa anif basef kofagefa, bola ofe'ma ifagw asasigwi a' uhali' wauhupawa mi'ipawaef. I'i ano'w nemata'w konda' basef ipa' sios pandakolasa, waf afambai ambagof awogufafi.

³⁶ Dei' a'i ihali'ipa. Ipa' kofagepama basef Godi? Ipa' atipa pefa' basef Godi a anis amam nematawa daias owa'? Owa'atin.^l ³⁷ I'i epen ami okom mondanda' ni'i Ambal Godi nasa'man nawalapa basef Godi si'i profet, a'a ni'i anin nefa' presen anin daian, anin a' nendegawa basef ifimba dei' anda'ef ipe'i, ifimba mu'uli Dembinaii. ³⁸ Ama i'i anin nindaiwa'ma basef ifimba, ipa' wapani pindaiwa'ma anin.

³⁹ Ipa' alipipai ae'ipai, ukup ipe'ipi pendehafel endilisi ma Ambal Godi nosa'mepa pegawalapa basef ananifi si'i profet. Ea' ipa' ina pesopama ufi'a'wa piga'i basefa anoga diga daiaga, owa'i.^m ⁴⁰ Apa' ipa' Kristen pendakolasa lotu, ipa' pendanda' maol andeande'ma atiasi dakolas ipe'ini negataga bo'wen.

Krais naga' ea' notanima nosafel wapani

15 ¹ Ipa' alipipai, dei' ae' a'i esa'ma nomonas ipe'isi wapani ma basef amamba bu'wami Godi ali' agasi'ipami. Ipa' pefa'am ea' basef amamba atom dei' pahapilam palutu banagepamam. ² Ae' a'ipipa basef amamba bu'wami. I'i ipa' pihapilam tatala'im, God nofa'epa nokwahomepa waf awafi pitanimai. I'i owa', pahapilam dowadowaf alop atop ando'.ⁿ

³ Basef ali' agasi'ipami, amamba ae' fowa' ali' egefa'ami. Amamba na'amba. Krais naga'ma nagakwaha awami ape'imi, si'i Baibel fowa' naga'iam.^o ⁴ Ea' esis sofa'ana salana nowaga matmat. Ama nimaguf bif hi'alef fagafe'ma wanifi, God nasa'mana wapani si'i Baibel naga'iam.^p

⁵ Ama main, nali' natagama Pita ea' nagil' natagama alipumi aninimi 12-pelaim. ⁶ Ea' nataga nandawalapa esis amam nematawa Kristen hiasi satolona, isimba alipisi sagaila anini hiasi a'owa' sikila' epes 500-pelais. Dei' anda' basef ifimba fafe'mago ipa', a'i alipisi isimba hiasi dei' ata' sape, apa' anis asaga' ea'.^q ⁷ Ma main, natagama Jems natolona. Ea' natagama amom aposel hiami matolona.^r ⁸ Ma main, owa' ae' agi' endilisi atolona wapani, natagama ae' si'i awani ma'man kogolan ata' kwapeti'i.^s

⁹ Dei' main, ae' ata' sa'owe ape awani falafuwai la'afena amom aposel. Ae' ina dei' bo'wawe ma epes sofale sigal'i aposel, owa'. Dei' main, anda'

k 14:33 1 Ko 11:3; 1 Ti 2:12; Ta 2:5 **l** 14:36 1 Jo 4:6 **m** 14:39 Kl 2:5 **n** 15:2 Ais 53:8-9
o 15:3 Mt 12:40; Ap 2:24-32 **p** 15:4 Lu 24:34; Mt 28:16-17 **q** 15:6 Lu 24:50 **r** 15:7 Ap 9:3-6; 1 Ko 9:1 **s** 15:8 Ef 3:8; 1 Ti 1:15

maol agahambombaga sios Godii.^t ¹⁰Owa' God atona okom maimaili natopalope dowaf nanda'e ape andeande'. Ea' dei' ae' ape. Anan nagatopalope dowaf, isimba ina safe' senalo, owa'. Sanda'e anda' maol banagambel a'owa' ikila' anom aposel daiam. Apa' ina ae' atowe anda' maol inimba, owa'. God natopalope dowaf, isimba atis dei' ape anda'am atapiwi. ¹¹Apa' basef ifimbai, ae' anda'am a'a amom manda'am, owa'. Basef ifimbai wamunaifi hapaifi. Basef amamba bu'wami fasimi atom afa' hiafai wawalipipam ea' amamba atom ipa' pahapilam sisihim.

Anaf owagama epes sagaga'i sosafel wapani

¹²Dondol afa' wawalapa basefa Kraisi nagaga' ma God nasa'mana nogosafel wapani. Dei' maina ipa' anipa pa'i basef na'amba paga'i, "Epes sagaga'i ina anaf sotanima sosafel wapani, owa'."?

¹³Ipa' anipa pa'i endilisi esis sagaga'i ina sotanima sosafel, owa'. I'i basef ipe'ifi endilisifiai, Kraisi wapani, God ina nasa'mana, owa'. Apa' owa' owa'atin. ¹⁴I'i a' endilisi God owa' nosa'ma Kraisi, dei' basef amamba afa' wagawalapami falafumi atom ea' waf ipa' pagahapifa Kraisi falafifi atef wafifi.^u ¹⁵Apa' i'i na'ambai, anif basef wapani. Dei' afa' a' otaga amam wambaso'am wagawalapa basef Godii. Dei' main, afa' wa'i basef alihif wawalapefa God nasa'ma Kraisi nogosafel wapani matmat. Apa' i'i endilisi God owa' nosa'ma sagaga'iai, dao' anen ina nosa'ma Kraisi wapani, owa'. ¹⁶Aho', ipa' anipa pa'i God ina nosa'ma esis epes sagaga'i, owa'. I'i basef ipe'ifi endilisifiai, God ina nosa'ma Kraisi wapani, owa'atin. ¹⁷Apa' i'i endilisi God owa' nosa'ma Kraisi, dei' waf ipa' pagahapifa Kraisi ina banagefa feगतopalopepa, owa'atin. Falafini atin. Dei' ipa' ata' papoma waf awafi atapi. ¹⁸Ea' epes isimba sagape sisihisa Kraisi sagaga'i, esis wapani higililas hi'ilas. ¹⁹Apa' mahapifa Kraisi ea' mape mohafa anen. I'i apa' mohapifana mope mohafana nimaguf magape itap apa'e atep, mope awepa kwahupa a'owa' mope migi' endilisi. Andeande'ma esis soga'i uwahipigama anis hiasi sogosambala Kraisi kwasakwasala, apa' magahapifanai a' sonda'i uwahipigamapa a'owa' endilisi. Apa' owa', owa'atin.^v

²⁰Ina' na'amba, owa'. Kraisi anaga' ea', owa' dei' endilisi God nafelana nosafel wapani. Anen nosafel na'amba nali'ma epes sagaga' ea'i, si'i gwa'aisi' sali' sagaof aofi.^w ²¹Dei' main, anona aman atotona nali' nawalapai waf epes sagaga'afi, ea' na'amba atin anona aman daiana nali' nawalapai ufiaw akwamba sagaga'i sogosafela'wi. ²²Hiahaom amamba na'amba. Mini'ap Adami hiasi hi'alas saga' atin. Ea' na'amba atina epes isimba hiasi hi'alas sagape sisihisa Kraisi, anaf God nondas

^t 15:9 Ap 8:3; 2 Ko 6:1; 2 Ko 11:5,23 ^u 15:14 Ap 1:22, 4:33; Ap 5:32 ^v 15:19 Kl 1:18
^w 15:20 Ro 5:12,18

sosafel wapani sofa' ambal namili ma sogape namis.^x 23 Apa' epes hiapai atona atin mope mondasasa nogota ape'itai. Aman nagali'i, anen Krai. Anen si'i gwa'aisi sali' sagaofi. Ama nemaf afamba nogotanimafi, apa' hiapai ananipai a' mosafel wapani. 24 Ama main, nemaf akutaifi fetaga ma hiahaom hiami awami higililam hi'igalam. Nemaf afamba Krai a' nohambombaga banagami hiami mamimami bu'wami awami magape ilif itapi hi'ilam, ea' noso'ana banagami ananiami ma nugumafi hiahaom hiamii mefe'ma ahamana God.^y 25 Dei' main, Krai a' nope Dembinai King nefe' nefe' notagama nemaf anen nogatalogofa bousi ananisi hiasi sogafe' lafela bo'wagah ananigahi hi'igalas.^z 26 Anen a' nili' nili'amona bousi isimba hiasi ea' nigi' nili'amona ga' si'i bounai nape nagagi'ii nosopamana hi'ilana.^a 27 Dei' main, fowa' God na'ias na'amba na'i, "Anaf ae' enda' hiahaom hiami, hi'ilam moloma epes hiasi wapani sefe' lafela anen."

Basef ifimba faga'i God nanda' hiahaom hiami mogafe' lafela Krai atona. Ea' apa' mogawa basef ifimba faga'i na'amba fa'i hiahaom hiami ifimba ina fa'i God, owa'. Anen nanda' hiahaom amamba hiami mape lafela Krai. 28 Nemaf afamba hiahaom amamba hiami mogafe' lafela Krai hi'igalam, ea' Nogamana Godi atotona a' nofe' lafela anen nali' nanda' hiahaom amamba magafe' lafela Kraisi. Ea' God nope nogali' endilisima hiahaom hiami hi'igalam moloma epes hiasi wapani. 29 Anis epes sati waf bu'wafi anis Kristeni sape banagesa bousi sahas saga' ea' epes isimba satilis sahapifa Krai sofa' baptais. I'i epes sagaga'i anaf owa' sosafel wapania, epes isimba sogofa' baptais epes sagaga'i anaf sogawa sotaga sope si'imama? I'i endilisi ma anin atitin nagaga'i anaf owa' nesafel wapania, dei' maina isimba sogofa' baptais epes sagaga'i? Owa'atin.^b 30 Afa' wapani, dondol anis sa'i sohambombagafa. I'i epes isimba sagaga'i owa' sotanima sosafelai, dei' maina afa' wanda'as wagape na'amba? Owa'atin. 31 Alipipai, endilisi ae' andagalaipa ma pagape sisipama Krai Jisas dembinai ape'inai. Ea' anif basef wapani endilisifi atif si'i ifimba. Nimaguf hiafi danda ae' ape si'i agaga'i.^c 32 Ae' agape Efesus apa' anda' wandaf aloma mafis magail alupi lu'wami. Amamba atiasi ae' efa' hiahawes bu'wasi maisam? I'i a' endilisi esis sagaga'i owa' sotanima sosafela, ea' si'i anis epes gawaisi saga'i, "Hapaisi, apa' mea' gwa'aisii embela naman mogaga'."

³³ Na'amba anis epes sombaso'mepa. Anif basef gawaifi fa'ias na'amba fa'i, "I'i apa' mofe' mogaloma epes sanda' waf awafii, esis a' sohambombaga waf bu'wafi ape'ifi."^d

^x 15:22 1 Te 4:16; Re 20:5 ^y 15:24 Mt 22:44 ^z 15:25 Re 20:14, 21:4 ^a 15:26 Sam 8:6

^b 15:29 Ro 8:36 ^c 15:31 2 Ko 4:10-11; Ais 22:13; Lu 12:19-20 ^d 15:33 Ro 13:11; Ap 26:8; 1 Ko 6:5

³⁴Dei' ipa' pekwaha ukup amamba magahipai, pitanimai a' ukup pendape andeande'. Ipa' ina penda' waf awafi wapani, owa'i. Ae' enda'epa ambagof awagofa anif basef dei' iga'ipipafi. Anis epes ipe'isi ina dei' sogawa God endilisi, ata' owa' atin. Kofagema amamba ipa' atipa.^e

Alop pagaga'i pogosafel wapani, anop daiap

³⁵Apa' anona aman atiasi nogahali' na'amba ni'i, “Esis sagaga'i anaf sosafel si'imama? Anaf sofa' alop mamahopa ma sogosafel wapani?”
³⁶Anen nogahali'ma basef na'ambai okom magahanai. Dei'main, apa' magawa olemb witimb o hiahawes, isimba owa' sogaga'ia atiasi isimba ina sope namis, owa'atin. ³⁷Hiahawes isimba apa' magawasi, isimba ina sataga atifis hi'ilas si'i agof o soh mais, owa'atin. Apa' mawa nalelef atelef dowaf, anis gwa'aisi daias.^f ³⁸Apa' God atona nanda' nalelef afalemba pepe'alef fataga nohotagw ea' soh handanda'alef afis mais sagi' sataga sail si'i anen atona okom mandanda' na'i sogataga. Ea' anen atona nandanda' lawah si'igah haloma soh maisa hiahawes hiasi ma gwa'aisi isimba atona atin daindai.

³⁹Alop hiapi hiahaop ambagof fagapaipi ina atotop, owa'atin. Alop epesi anop daiap, alop mafisi anop daiap. Amigufi anop daiap, a agufi anop daiap. ⁴⁰Ea' hiahaom magape heveni maloma magape itapi amamba hiami mape. Apa' sosafa hiahaom anef daiap, sosaf itapafi anef daiap. ⁴¹Awin alipini anef sosaf, a owambini anef daiap. Ondowa anef sosaf, apa' ondowa wapani hiafi daindaiaf.

⁴²Waf sagaga'i sogosafel wapani, afamba ea' na'amba atin. Alop apa' dei' magawapi, apamba atiasi aop folo'ogalapi. Alop pogosafel wapanii, apamba ina anaf awapi, owa'atin. Pepe atapip.^g ⁴³Alop apa' magawapi, apamba a' awasip folo'ogalapi. Alop pogosafel wapanii, apamba bu'wapi fasipi endilisi. Alop magawapi apamba ina banagapi, owa'. Alop pogosafel wapanii, apop banagapi. ⁴⁴Alop apamba a' magawap, itapi. Apa' alop pogosafel wapanii, ilifapi, Ambal bu'unai Godi nugumafiapi.

Alop apamba biafip ilifapi itapapi pape.^h ⁴⁵Baibel wapani naga'i na'amba na'i, “Aman nagali'i Adam nataga ambal namilinai.”

Apa' Adam nagi' nagatagai nataga ambal bu'unai ma nogaso'as ambal namili epesi. ⁴⁶Apa' alop ilifapi ina pataga pali', owa'atin. Alop itapapi apop pataga pali'. Ea' alop apamba ilifapi pataga pagi'.ⁱ ⁴⁷Aman nagali'i, God nanda' itap nanda'ana nataga ambal lapaona. Apa' aman nagi' nagatagai, anen aman heveninai. ⁴⁸Apa' epes hiapai itapipai, apa' mandati na'amba atin si'i aman anamba God nanda' itap nanda'anai. Apa' epes hiapai hevenipai anaf motaga mundati na'amba atin si'i aman

^e 15:34 Jo 12:24 ^f 15:37 Jen 1:11 ^g 15:42 Fl 3:20-21 ^h 15:44 Jen 2:7; Jo 6:63; 2 Ko 3:6,17 ⁱ 15:46 Jen 2:7

anamba nagafi'i heveni. ⁴⁹Dei' apa' ata' mape si'i aman anamba itapanai ea' anaf mope na'amba atin si'i aman anamba nagafi'i heveni.^j

⁵⁰Ipa' alipipai, dei' a'ipipa basef ifimba usi'ifi. Epes itapasi anaf ina la'ifisa sogawis anamba God nagala'ambemagoma, owa'atin. Hiahaom itapami higiligalami ina anaf la'ifima mofa' banagami mogape lifilafi, owa'atin.^k

⁵¹⁻⁵²Ipa' peme', dei' ae' a'i ewalapa anif basef fali' fape fandambaha' ma ipe'i. Anaf apa' hiapai ina moga', owa'. Atef bif kwafalis atis alof akutainai nogalef, apa' hiapai anaf mondambema hi'ilepa amondati na'a. Dei' main, alof anamba nelef ea' ma esis sagaga'i sogosafili, anaf ina ata' sog'a' wapani, a'owa'. Ea' apa' mogape itap apa'e wapani mondambema amondati na'a.^l ⁵³Dei' main, alop apamba apa' magawapi anaf apotoga pondahi namop pope andeande' lifilafi. Alop apamba pagaga'i apotoga namop pope dondol.^m ⁵⁴Endilisi, alop apamba magawapi anaf potaga dambaip pope andeande' lifilafi. Ea' alop apamba pagaga'i anaf posafel apondati na'a pofa' ambal namili pope dondol. Nema' afamba anif basef Baibelifi afetaga faga'ias na'amba fa'i,

“God natalogofa ga' nikila' wandof nanda'am hi'alam ea'.”ⁿ

⁵⁵“Ina', ga', banagami ine'imi amuma? Ea' wamba'w ine'ikwi hikali'wi akuma? Owa'atin endilisi.”^o

⁵⁶Wamba'w sagaga'ma'wi kwataga ma waf awafi ea' banagami ma waf awafi magataga na'amba. Apa' epes hiapai mumbisila' basefa mu'uli Godi hi'alapa. Isimba atis dei' mu'uli inimba nawalapai banagami ma waf awafi. ⁵⁷Apa' mundanifela God. Ama banagami Dembinai ape'inai Jisas Kraisi atom God nowa' banagapa ma dei' migikila' wandafa mogali'ama waf awafi.^p

⁵⁸Ea' dei' ipa' alipipai endilisi ae'ipai, pendape banagepa andeande'. Ina ombal mehepa kwasakwasala pendahagas, owa'i. Dondol ipa' banagepama penda' maol Dembinaii. Dei' main, ipa' pegawa maol inimba panda'ana Dembinaii, ina anaf newala dowaf, owa'atin.

Otamba begatopalopa amam nematawa Godii

16 ¹Dei' ae' anif basefa otamba ipa' pa'i pekolasamba pegaso' esis amam nematawa Godii. Ae' ali' ihimba'mas ufia'wa sonda' maol inimba ma esis sios Galesiaisi sondakolas daindai ea' dei' a'i ipa' penda'as na'amba atin.^q ²Sande nimaguf danda ipa' hipai atona atin ukup pendanda'ma otamba pegefa'amba wik gagali'i ea' pewaloga otamba ambamba pembe'amba dondo' ma ipa' pegefa'amba be'eh dei pimafiamba

j 15:49 1 Ko 6:13 k 15:50 1 Te 4:15-17; Mt 24:31 l 15:51-52 2 Ko 5:4 m 15:53 Ais 25:8 n 15:54 Hos 13:14 o 15:55 Ro 6:14, 7:13 p 15:57 2 Kro 15:7; Re 14:13 q 16:1 Ro 15:25-26; 2 Ko 8:1-9; Ga 2:10

ifagw ipel'igwi. Ama anaf ipa' ina penda' maol lu'wanima pegelaoma otamba pegasa'amba, owa'. ³Anafa etagamepa, dao' ipa' pendandepa anom amama mogofa' otamba ambamba mogafe' Jerusalem. Ama ae' ese'ama basef amoma mofa'ef esapa'am mogafe'. ⁴I'i andeande'ma egafe' wapanima, dao' amom mofe' molome.^r

Pol na'i nefe' niti esis Korin

⁵Anaf ae' efo'o ili' ewala itap lu'upa Masedonia, ea' efo'o tagamepa. Dei' main, ae' okom mandanda' a'i ata' ili' ewala itap apamba Masedonia efe'.^s ⁶Ae' okom mandanda' ma'i ata' epe anif nimaguf elomepa. Ae' ina egawa, epe elomepa nimaguf ma'wif nogota naoh gogohafel lu'ugwatai hi'igalawa ma main, efe' wambel mamahogoma, ipa' pitopalope pimafi ma hiahawes, pilutumi pehapone ufia'w.^t ⁷Ipa' pegawa, ae' andaiwa'ma igatilipa nogota bandata, owa'atin. I'i Dembinai niga'ias na'amba ma, a'i ipani nogota laota kwasakwasala elomepa. ⁸Apa' ae' a'i epe Efesus efe' etagama nemaf afamba Pentikos.^u

⁹Dei' main, God nausi'mi ufia'w kwagal alihi'w ea' ma enda' maol bu'wani egaloma amam nematawa hiasi sombema nelelemba sogahipifana endilisi. Apa' owa' bousi hiasi sapaogon wapani.^v

¹⁰I'i Timoti nogatagamaepa ma, dao' ipa' solawaipa andeande' pimafiana ma anen nogape opaf awanef la'afena ipa'. Dei' main, anen nape nanda' maol Dembinai si'i ae' ape anda'an.^w ¹¹Na'amba anin epen okom mondanda'mana ni'i anen falafunai neso'ana alafuga, na'ambai owa'i. Ipa' penda' opaf ananifi fope sa'ombel pisi'ana hiahawes petopalopana ea' pilutumana pehaponana ufia'w ma nogafi'mai ae'. Ae' epe ehafana eloma anis alipisi.^x

¹²Ea' basef sahomapa ape'inai Apolos fagape na'amba. Nimaguf hiafi a'ipana dindinip a'i anen ata' nolomago anom alipumi ata' mofa'o mitiago ipa', apa' anen nandaiwa' endilisi ma nogafo'o dei'. Nambimba i'i anen niti Dembinai nonda' ufia'w kogala nogafo'o, dao' a' nofo'o.^y

Anif basef akutaifi Pol naga'iefi

¹³Ipa' solawaipa andeande' pindalutu banagepama pigahapifa Krai. Ipa' pendape epes banagepa endilisi si'i dembipai ea' pendalutu bangepa. ¹⁴Hiahawes hiasi ipa' penda'asi, ipa' ukup pindapindaila God noloma epes penda'as.^z

¹⁵Ipa' pegawa wambota Stefanasi sali' sataga Kristen sali'ma Grik hiasi. Ea' esis ukup pa'ipa'i a'owa' atapisa sanda' maol sagatopalopa epes

^r 16:4 Ap 19:21 ^s 16:5 Ro 15:24; Ta 3:12 ^t 16:6 Ap 18:21 ^u 16:8 Ap 19:8-10; 2 Ko 2:12; Kl 4:3; Re 3:8 ^v 16:9 1 Ko 4:17 ^w 16:10 1 Ti 4:12 ^x 16:11 1 Ko 1:12; 3:6
^y 16:12 Sam 31:24; Ef 6:10 ^z 16:14 Ro 16:5; 1 Ko 1:16

Godi. Alipipai, ae' a'ipipa dindinipa^a 16 pegape lafela epes isimba soloma epes mamahisa sandao'oma sanda' maol inimbai. 17Dei' ae' sonahe ma Stefanasi Fatunatus maloma Akaikus amom mafi'mai ae'. Dei' main, ipa' ina atiasi la'ifipama pigafi'i na'a'e, owa'. Amom dei' matopalopepa maho'ofepa mafi'mai ae' na'a'e.^b 18 Amom manda' opaf ae'afi fape awanef mowa' banagae ea' mowa' banaga ipa' wapani. Ea' andeande'ma ipa' pegasa'ma agof amam na'ambaimi.^c

19Ea' esis sios sagape daindai itap apamba lu'upa walemb hielimbi agol Esiai sanda'mepago nemaf bu'wafi. Akila i Prisila saloma esis Kristen sios sandakolas ipat esis biasi, esis wapani sanda'mepago nemaf bu'wafi endilisi ma agol Dembinaii.^d 20 Alipisi hiasi sagape na'a'i sanda'mepago nemaf bu'wafi ipa'. Waf apa' amam nematawa Godi, ipa' hipai atona atin pendaso'ama lagof atin pelomago sahin owan ipe'isi.^e

21Dei' ae' Pol ahapila pen lagol ae'agili atogol anda'mepago basef ifimba bandafi atif. Ae' anda'mepago nemaf bu'wafi ipa'.^f

22I'i anin epen mamahina nendaiwa'ma nigaso'ana nembel ananimbili Dembinai, okom ae'ami a'i anaf God nohambombagago epen inimba higililano.

Dembinai ape'inai, ae' okom mohafel endilisi, a'i ina' fi'i. 23 Ae' a'i okom dembinai Jisasi naganagaila ipe'i notopalpepa dowaf nope nolomago ipa' nowa' banagaipa.

24 Ae' a'i okom lu'unai ae'anai naganagaila ipe'i nefe'mago ipa' hipai palome magape sisihpama Kraisi Jisasi.

Basef ifimba ea' ma'uf.

a 16:15 1 Te 5:12 **b** 16:17 Fl 2:29 **c** 16:18 2 Ti 1:15; Ap 18:2,18,26; Ro 16:5
d 16:19 Ro 16:16; 2 Ko 13:12 **e** 16:20 Kl 4:18; 2 Te 3:17 **f** 16:21 Ga 1:8-9